

四庫全書

史部

欽定四庫全書

山西通志卷一百十八

人物十八

大同府

明

侯復應州人洪武丙子舉人授國子監監丞遷翰林院
編修仍兼監丞事尋晉國子監司業前後三涖國子
正身率物人士翕然宗之

田炯大同人洪武中起家太學生洊歷中外勤慎簡約
後官吏部左侍郎銓選精當有山巨源遺風

羅義建文時鎮遠衛戍卒也靖難師起義詣闕上書請
敦親睦之義又走北平上書忤燕王旨下獄及即位
得前所上書赦之授兵科給事中尋遷湖廣叅議

李彛渾源人永樂甲午舉人授監察御史以剛直有聲
臺中後歷江西按察使治獄明恕遷浙江布政使監
厲素節出納錙銖必謹尋卒於官

齊政大同人永樂丁酉舉人授鴻臚寺序班改鳴贊秩滿遷主簿仍掌鳴贊事擢寺丞歷右少卿晉正卿疏請致仕優詔不許又四年復疏請許歸展墓畢復回寺理事年七十七始予告歸政貌魁梧音吐如洪鐘侍殿陛進退皆有常度卒遣官諭祭卹典獨厚

張羽山陰人永樂庚子舉人授廣西道御史持已嚴正彈劾不避改龍泉縣知縣尋以親老乞休

寇謙應州人永樂中授戶科給事中時相頗專擅方得

上寵謙抗章糾之風生朝宁

郭頤應州人永樂中貢生由知縣擢監察御史出按京畿文皇帝北征抗疏力爭後復屢疏言事朝右咸側目遂拂衣歸

李文煥大同人永樂中由太學生累官吳堡縣知縣文煥廉敏有為初任神木典史禁亂誅暴以幹濟稱至是為親民官生聚教訓日久愈力民皆親而愛之論者推為通材

米璫山陰人宣德己酉舉人端嚴有操行授慶陽府同知遷南京戶部郎中所食惟菜羹歸營產營墓事起補永平府知府所得俸錢蠲賑饑民外悉分給宗族郡大璫曹某數來關說面拒之不少徇卒後人相傳為神云

石琯字信之應州人數歲知孝友父嘗有疾灼艾於腹琯亦取艾灼其腹曰吾不忍父獨痛苦也父嘗為琯置衣琯曰兄長於我請先為兄製嘗踰戶限衣縫而

止兄戒以緩步琚跪謝父兄皆奇之領宣德己酉鄉
試癸丑進士收通州倉糧宿弊悉釐革正統初授禮
科給事中擢金華知府鄰郡盜起出兵擊之民避盜
來者千百為羣乏食琚欲開庾以濟上官難之琚曰
彼迫於殍死則亦為盜矣擅開庾與迫民為盜罪孰
重竟開庾以濟蘭谿吏徐世揚浦江卒王猛烈皆為
邑患琚置之法衆為歌謠頌之母憂去都御史軒倪
言於朝起原官尋陞福建右布政使入覲福州守雷

硯以金峻却之上聞其賢以為南京禮部左侍郎
未幾召為禮部尚書靖恭於位朝望益孚甫一載而
卒年六十有四

吳翔大同人正統初任代王府教授以數諫被謫都御
史富薦其才起知曹縣有惠政

劉文字宗華大同人以鄉貢選習譯字舉正統元年進
士授中書舍人仍譯字十四年扈從北征還陳邊務
數事景皇帝召入便殿面問之尋命提督四譯館丁

母憂詔奪情任事陞吏部郎中天順初以迎駕功陞
為右通政成化九年命偕都督李文撫安西番三年
後歸乞休致至家卒

王尚文廣靈人正統丙辰進士授戶部江西司主事額
森入寇逆璫王振強駕北征尚文督餉以從土木敗
尚文既脫行數里復奔還求駕所在聞額森擁之去
因慟哭隨之遂及於難後英廟錄死事諸臣贈卹有
加子翊以廕入國學

孫祥大同人正統十年進士由兵科給事中擢右副都御史守備紫金關額森逼關都指揮韓青戰死祥督兵巷戰兵潰被殺言官悞劾祥棄城遁去寇退有司修關得其屍戰地焚而瘞之不以聞祥弟祺詣闕言寃詔卹其家

孫遜吉字餘慶渾源州人正統丁卯舉人授延長縣知縣植善鋤強賢聲甲關中擢監察御史巡鹽長蘆監軍榆林所至風紀肅然後復按四川江蠻內訌鎮巡

不以聞特疏正其罪救旱疫災蜀人有春雨和風之
謠遷陝西僉事轉副使備兵固原撫治屬番咸悅服
晉右布政使遷左布使引疾歸

趙翔大同人少材武有膽略正統中以軍功累陞宣府
副將扈駕北征至土木額森以鐵騎乘之軍大潰翔
奮勇力戰歿於陣英廟復辟贈卹特厚

劉道懷仁人景泰丙子舉鄉試第一天順甲申成進士
選翰林院庶吉士改吏部主事歷本部員外郎中終

河南布政使道文章政事卓有可觀解組後閉門養
高蕭然不與世接

黑能原任大同軍旗屢立戰功歷陞指揮僉事調任寧
夏安邊營天順間北兵深入衆皆披靡能奮勇爭先
力戰陣亡事聞贈指揮同知子黑鑑襲能職後調平
魯衛遂入籍子孫蕃衍

郭容字子仁渾源人成化乙酉舉人以博洽薦於朝召
對便殿稱旨錫賚甚厚命以秩辭不受後任寧海知

州興廢舉墜革弊釐奸時有任虎者為民害縛而懲之餘黨匿不敢出州濱海鄙陋無禮教婚嫁爭財容定條約有不能葬者資以棺立養濟院粟布以時頒給暇則按視疾苦條約利民十六事力行之後督餉雲中餉如期集羨金千兩還所司人服其廉還任以疾寓都門遂不起聞者無不悼惜

白鸞字孟禽成化丙午舉人丁未進士觀政工部虞衡司督修代王墓於大同費省役速擢御史舉廢滯抑

豪橫為忌者所中謫曲周丞相遷章丘令丁父憂歸
年四十六歲卒

張安宇定之大同人世襲百戶成化間以神木等處功
陞指揮僉事再以威寧海子功陞山西行都司指揮
僉事又以守備大同左衛地方功陞指揮同知加都
指揮使弘治間改守朔州又改天成一年充大同游
擊將軍凡五載充副總兵協守寧夏以賀蘭山功陞
都督僉事屢有白金文綺蟒衣之賜正德間寧夏有

警掛征西將軍印一年大同有警復掛征西前將軍
印俱充總兵官鎮其地時年六十疏乞致仕得請卒
年七十五安生長代北家傳韜略天資凝重才兼智
勇尤能練士卒知幾料敵自偏裨至大將四五十年
間大小數十餘戰未嘗敗北前後巡撫總制多薦之
大司馬以為鎮將第一子輓輓俱有父風

撒俊大同人貢生成化中知陝西醴泉縣增築外城建
立場市歷九載剛方如一

王縉山陰人成化中貢生授臨邑縣知縣性清約勤於民事早起據公堂治文書不輟民有以訟至者輒情理諭之不率笞以荆條不苛責也間復單騎巡阡陌中呼農夫田婦問耕織事如家人父子有特捺遇義不可不惜以去就爭邑有數大姓為盜誣扳部使者屬縉鞫之無所驗力白其寃部使者移陵邑覆訊悉論死縉怫然即日引疾去閱兩月真盜發他邑賊証具在部使者愧甚特疏薦准其致仕

田天澤應州人弘治壬子舉人任耀州知州時流賊圖定興攻城幾陷天澤督兵拒走之有巨璫挾寵恣睢陝西諸郡縣類被科索跡且至耀天澤曰他州自有耀州自無致政歸卒贈通議大夫

成文大同山陰人弘治十五年進士由知縣擢御史正德中阿爾托索額布勒陷堡寨五十三巡撫張翼鎮守太監朱彬反冒奏首功文出巡按盡發其奸翼等賄中人傾文會文劾僉事趙應龍應龍亦訐文細事

被逮斥為民嘉靖中累官右副都御史巡撫遼東卒
李翰臣大同人正德三年進士官御史巡按山東吏部
主事梁穀誣歸善王當沅潛謀翰臣劾穀挾私近侍
貴人為掩飾逮繫詔獄謫廣德州判官卒

吳嘉聰字惟德振武衛人正德辛未進士授豐城令土
寇嘯聚瑞州勢甚猖獗嘉聰督大兵剿平之賜金幣
擢守曹州黃河決築防有功擢刑部員外郎會江西
逆變初靖以嘉聰為南昌守宸濠逆狀久未上嘉聰

援筆頃刻而定勅擇宗裔可繼藩祀者嘉聰首推弋陽王興情允服江隄大圮嘉聰悉力規計旬日告成至今名為吳家塘擢山東按察司副使兵備徐揚丁內外艱先後五載克盡禮卒年六十六

郭登庸山陰人正德甲戌進士授監察御史出按陝西劇賊樊紳作亂督將士討之亂尋定雅善發奸嘗至一寺察其僧有異密圍以兵搜獲婦女十餘人竝軍器若干立治如律改其寺為書院再按浙江省輔張

亨敬謀得永嘉沃田百頃屬之再三登庸不答至浙
巡部及溫遽引疾去二年起督湖廣學政力正文體
所拔士後多為名卿遷應天府府丞改順天府府丞
郊祀直園丘門為世廟所知擢大同巡撫以鄉里辭
改宣府修築邊牆餘羨金數萬悉籍以報部未幾以
疾乞歸後起陝西巡撫不赴生平工書法篆隸行草
俱臻其妙詩亦瀟灑有致所著有自修圖

張汝舟渾源人監生正德間由萬泉經歷陞順天大城

知縣時流賊劉六輩突至汝舟以孤力守危城多方禦防賊大合來攻城陷巷戰而死其子策以護父并遇害事聞贈光祿寺寺丞廕一子入監讀書

陳韜大同人正德中任招遠縣丞流賊劉六等奄至城下韜慨然任捍禦事督士民死守越數日外援不至城破被執磔殺之事聞贈登州府通判

李景廣靈人歲貢判高郵州有政績擢知西華縣正德中流賊攻圍甚急景躬環甲冑與民死守力竭城陷

賊執景以刃脇之景不屈遂遇害事聞贈光祿寺寺丞錄子延齡入監

蔣應奎大同人嘉靖丙戌進士授工部都水司主事治河呂梁遷營繕司郎中董建兩宮功成超拜太僕寺少卿遷應天府府尹以嚴為治勲戚中有橫肆者悉裁以法捐金修學宮墾秣陵荒田千餘頃擢副都御史巡撫遼東寧遠開原一帶壁壘維新入為戶部侍郎改兵部兼僉都御史協理戎政應奎性恬淡為諸

生時嘗鬻衣養父母既貴益堅素節卒之日喪幾弗克舉後贈兵部尚書

溫景葵字汝陽大同人嘉靖戊子舉人令長山陞御史守蘓州竝有治績庚申邊事孔棘兵道初設乃自霸州道移任永平四年創制運籌詳審精密如穀賤傷農立為糴貯法因軍餉對支掠害商人立為入倉法因將士重冒行糧濫費立為稽塗法因後府催徭殘坑衛職疏准為徑解惜薪司法修建昌營石門寨半

壁山等城為邊疆保障處置有方財不費而民不擾
選士入派山書院延師豐稴嚴程課如親子弟科甲
多出其門特擢都御史巡撫順天三載告病歸

劉文慶陽和衛人襲指揮同知屢遷署都督僉事涼州
右副總兵嘉靖八年以總兵官鎮陝西大破洮岷叛
番若籠板爾諸族斬級三百六十有奇十一年寇西
掠還將犯寧夏河東文慶擊敗之晉都督同知後落
職起鎮延綏改甘肅卒謚武襄

任中立大同人嘉靖辛卯舉人初任沂水知縣時巨寇聚掠建策擒獲陞順天府推官轉戶部主事征倭敘功授正五品著有管規集

潘高寧化人弱冠登嘉靖壬辰進士偕名賢講道修德視章句不屑也屢遷大理寺正獄無遁情朝多美譽以忤時宰外轉陝西叅議釋冤均賦懲貪戢強未幾罷歸後持節蒞晉者交章薦卒不果用

郭石山陰人嘉靖甲午舉人以母老就選授滕縣知縣

墾荒田治兼并寬徭役捐俸構橋民德之名曰郭公
橋發奸摘伏奸猾不敢欺訓課諸生周其貧乏戒其
跢弛士皆以行誼相勉辛酉分校所錄皆知名士陞
戶部主事滕民遮留盈奎建祠祀之累官整飭延綏
道駐榆林謹烽燧嚴斥堠增置城堡練習士卒會敵
大舉鼓舞將士躬臨矢石三入三敗之俘馘以百數
丁艱歸補山東按察使僉事尋致仕

樊深大同人為通政使嘉靖二十九年陳禦寇七事中

言仇鸞養寇要功上方眷鸞立斥為民穆宗初復官
尋遷刑部右侍郎齊康劾徐階深劾康并詆高拱時
登極詔赦死罪以下而流徒已至配者所司拘律令
不遣深言殊死猶赦而此反不及非所以廣皇仁詔
從其議旋晉左侍郎罷歸卒

郭民敬山陰人嘉靖丁未進士山東壽光知縣治行濟
南第一徵御史巡按南直奏蠲租賦民賴蘇息復按
四川墨吏望風解綬去

馬豸大同人嘉靖壬子舉人文章行誼為士林望初守
蘇州有惠政邊事孔棘豸督民兵以計拒之遷鎮江
府同知防江練舟師盜賊屏跡署丹陽諸廢聿興開
馬嘶港為一邑永利擢戶部員外尋陞潁州兵備僉
事潁多盜難治豸多方擒之民賴以安泗水衝嚙貽
陵寢患豸躬臨其地親督料理堤得永久以憂歸哀
毀得疾行至廣陵卒

李一鶚大同人嘉靖乙卯舉人性醇篤初任無極知縣

調江寧積胥猾吏追累逋糧減額外徵派陞南京戶部主事轉刑部郎中為同舍所忌左遷鄜州同知轉真定府通判汝州知州以親老取道歸省不赴

王用中大同人嘉靖丙辰進士授山東平原知縣邑多盜用中立法捕緝四境帖然陞戶部主事引疾歸撫臺請督雲中書院鄉論敦倫方正者必首王氏兄弟焉

覃應元字德芳大同人嘉靖乙丑進士授歷城知縣縣

近郭多汙萊為開田北山下引湖水為渠教以灌溉
又開東山險路便車馬往來三年奏績第一以與撫
軍忤僅遷南京刑部主事歷戶部員外遷兵部郎中
出為河南府知府擒妖民許天官及嵩山礦徒首惡
郡內晏然遷四川分巡副使獠人猖逆募健兒焚其
巢復詳為條教導以禮義獠人畏服移陝西副使備
兵延綏甃神木鎮羗諸城堡壑永濟荒田調湖廣長
沙兵備遷陝西苑馬少卿值歲饑馬斃牧卒貧不能

償部使者嚴督之與之忤以延緩不任職勒令致仕
卒之日圖書數卷蕭然如書生

薛綸字汝為號幼泉其先興化人從戎至天城遂家焉
嘉靖甲子舉人戊辰進士授長安令蘇民力清土田
禁狡民投匿勢豪伸理張良弼等冤擢兵部武選司
主事條上制虜安邊十數事出為開封守彈壓強藩
推抑豪右擢陝西憲副治兵定邊當市羣虜索賞而
譟綸叱之無敢譁者以蜚謗罷官歸卒於家

李斌廣昌人嘉靖中北兵犯境斌領大軍至廣昌城土
巷口衝鋒破敵斬敵甚多援兵不至見殺上命御史
谷嶠親詣戰場祀焉

宗民牧山陰人博洽羣書醫卜天文地理皆通曉尤能
詩備諸家之體時當選貢拔第一次名齒且長讓之
人服其誼後七年竟以待年得官任永壽縣永與令
不合曰仕不得行其志何難一去哉亟投劾歸耕讀
如未官時

石敘渾源人歲貢嘉靖間任陝西白水知縣歲大饑民多流散敘集父老開誠撫綏民皆感泣復亟為請賑多所全活

王用賓大同性醇篤精舉業屢舉不第嘉靖中以貢授靜海知縣未浹期意頗厭之投劾歸讀書課子弟時與郡中張通府應武溫撫軍景葵文酒從容時人號為雲中三老

林椿字永年大同人幼有孝行嘉靖中襲父職右衛指

揮僉事積功晉署指揮僉事歷左副總兵協守大同
俺答入總兵張達被圍椿時別擊零騎於彌陀山急
引兵西救一日三戰亦陷重圍與達胥歿贈都督同
知諡忠勇立祠賜祭葬子鳳騰廕指揮僉事世襲

呂璋廣昌人嘉靖中任廣昌所百戶以材武為衆所推
甲寅敵入犯縣境璋衆止百餘人恐不勝于逆春謂
出其不意擣之或可保一城生靈璋遂率衆奮戰
直貫敵營殺傷數百人已而敵益至璋被圍逢春馳

騎救之矢盡俱遇害敵亦創甚遽引去御史谷峪表其門曰忠烈

按省志府志俱作吳璋今據縣志正之

焦埏大同後衛人祖澤父承勲俱總兵官勲勞著嘉隆間埏以世將子喜兵法精騎射以功累官大同副總兵崇禎末大兵及山海關聲勢甚急埏奉命率所部赴援力戰不屈死事聞贈卹有加

栗繼芳大同人嘉靖中敵入寇禦之繼芳以試百戶從

至小鶯圪塔茨林兒獨與敵遇直前與之搏戰斬數十人敵圍之數重繼芳不少挫戰益力旋歿於陣事聞詔祀勸忠祠中

關山大同人嘉靖中以都指揮使任宣府中路叅將敵擁六萬騎由毛家溝入葛峪勢甚亟山率所部千人奮勇進兵既交被圍風霾大作矢攢射如雨山督將士力戰自辰至酉越次日黎明殺傷幾千餘人遂歿於陣兵部上其狀賜贈卹

王福大同人驍勇通兵略嘉靖中以指揮管千總事二十八年敵入犯福出哨與遇於曹家莊奮勇徑進斬首五級陷陣中以死事聞叙恤有加

劉伏玘儻負氣節有友王三鼓衆殺主將叛歸插部鳩母殺妻焚屋以示不疑渠帥禮為上賓封數千戶予丑間統兵內侵太原平定諸郡邑重罹荼毒甲辰入紫荆門直抵完縣世宗震怒械繫中丞朱方總制翟鵬罷大司馬毛伯溫杖死職方郎韓君勗皆以王

三故也竝懸賞格募能生擒王三者予千金陞官五級世世繼襲伏玘憤曰我家世食祿無寸報王三匹夫敢作孽如此戮妖醜報天子非玘不可請以死從事乃留三子以養父母而自攜妻女就道賣酒關口陰圖其事期年王三跨馬挾矢從四健兒按轡關下問戍卒曰誰在此以伏玘對王三大喜促會玘亦具壺觴出迎馬前王曰弟何為在此玘曰貧不自給聊假釀酒得升斗為活計不圖今日見兄也因涕下王

曰弟無慮我且富貴忍使弟在此落拓乎伏玘歛涕
酌酒為壽三飲數盞即覺微醺顧謂伏玘吾欲至爾
家少坐佯辭不得至則拜見伏玘妻女如家人歡呼
曰二嫂取好酒來吾與弟飲當以盡醉為期且命健
兒取金遺之伏玘妻酌獻巨觥出禮健兒薄暮業皆
醉倒偃臥伏玘與同行三卒將椎劈其兩臂竝四健
兒縛送總戎覆核無偽檻詣京師上大悅置之法傳
首九邊授伏玘正千戶世襲金千兩三卒各百金官

百戶芳洲楊名作縛虎傳以美其事云

王家屏字忠伯山陰人隆慶二年進士選庶吉士授編修預修世宗實錄操江都御史高捷以官帑遺趙文華直書之捷弟拱祈稍諱執不可萬厯初進修撰充日講官敷奏剴摯上嘗歛容受稱為端士張居正寢疾獨不祈禱再遷侍講學士十二年擢禮部右侍郎改吏部甫踰月命以左侍郎兼東閣大學士入預機務去史官二年即輔政前此未有也每議事秉正持

法不亢不隨越二年繼母憂詔賜銀幣馳傳行人護
行服甫闋詔進禮部尚書遣行人召還請因聖節受
賀畢發留中章奏舉行冊立皇太子禮不報復偕同
官疏請俄遣中官獎以忠愛家屏疏謝因請上勤視
朝評事維于仁進酒色財氣四箴將獲重罪家屏言
于仁以庶僚上言而臣備位密勿反緘默苟容上虧
聖明之譽下陷庶僚蒙不測之威臣罪大矣尚可一
日立於聖世哉于仁得善去十八年以久旱乞罷極

言災異寇敵狀且言陛下深居靜攝朝講希臨統計臣一歲間僅兩覲天顏而已間嘗一進瞽言竟與諸司章奏竝寢不行乞賜罷歸用避賢路不報十月閣臣合疏請冊立以去就爭傳諭切責時家屏在閣請速決大計上遣內侍李浚傳語期以明年春夏家屏以口勅難據欲特頒詔諭立具草進上不用復諭二十年春舉行家屏喜即宣示外廷而隱踰十五歲語明年秋主事張有德奏請上復命止其事同官許國

執爭去時中時行亦去王錫爵省親還家屏遂為首
輔以國諫疏已列名不當獨留再疏乞罷不允乃視
事家屏端嚴秉公百司事一無所撓性忠謹冊立期
數更力請踐大信以塞口語消宮闈釁不報二十年
春給事中李獻可等請豫教謫外家屏封還御批力
諫而遣謫者相屬家屏遂引疾求罷上言漢汲黯有
言天子置公卿輔弼之臣寧令從諛承意陷主於不
義乎每感斯言惕然內愧頃年以來九閤重閉宴安

懷毒郊廟不饗堂陛不交天災物怪固徹宸聰國計
民生莫關聖慮臣備員輔弼既不能婉導密規防未
萌之欲又不能苦爭彊諫扶將墜之樞曠職鰥官久
當退避迺今數月間請朝講請廟饗請元旦受賀請
大計臨朝悉寢不報臣犬馬微誠不克感回天意已
可見矣至豫教皇儲自宜早計柰何厭聞直言概加
貶謫臣誠不忍明主蒙咈諫之名熙朝有橫施之罰
故冒死屢陳若依違保祿洵忍苟容汲黯所謂陷主

不義者臣死不敢出此願賜骸骨還田里奏不下而責以希名托疾家屏復奏言名非臣所敢棄顧臣所希者陛下為堯舜之主臣為堯舜之臣則名垂千載沒有餘榮若徒犯顏觸忌抗爭僨事被譴罷歸何名之有必不希名將使臣身處高官家享厚祿主愆莫正政亂莫匡可謂不希名之臣矣國家奚賴焉更使臣棄名不顧逢迎為悅阿諛取容許敬宗李林甫之奸佞無不可為九廟神靈必陰殛臣豈特得罪於李

獻可諸臣已哉疏入復遣內侍至邸責以徑駁御批
故激主怒家屏言言涉至親不宜有怒事關典禮不
宜有怒臣與諸臣但知為宗社太計盡言効忠而已
求去益力或勸少需家屏曰大臣不愛爵祿小臣不
畏刑誅事庶有濟遂復兩疏懇請詔馳傳歸家屏柄
國止半載又強半杜門不獲展其志以懃直去國朝
野惜焉閱八年儲位始定遣官賫勅存問賚金幣羊
酒又二年卒年六十八贈少保諡文端熹宗立再贈

太保予一子尚寶丞家屏家居時朝鮮用兵貽書經
略顧養謙曰今第以保會稽之恥激厲朝鮮以城楚
丘之功獎率將吏無為主而為客則善矣養謙不能
用兵竟數年無功其深識有謀類此

翟廷楠字棟叔渾源人少有大志以經魁登隆慶辛未
進士授涇陽知縣賊訟滋繁吏緣為奸懲宿蠹繩豪
右吏畏民懷捐俸修葺學宮歲祲申蠲賑移南大理
評事某有冤獄衆避不為理亟為平反有某坐法當

刑行金祈免叱出之寘於法異已者騰謗遂罷歸

田蕙應州人萬厯甲戌進士任蒲城知縣陞戶部主事
厯通政司左右參議性剛直不阿為忌者所中歸里
杜門謝客躬耕訓讀士論多之

李植字汝培大同人父承式僑江都官福建布政使植
舉萬厯五年進士選庶吉士授御史十年冬張居正
卒植發司禮馮保十二大罪上震怒罪保植由是見
知於上明年巡按畿輔請寬新定百官乘驛禁從之

時卜壽宮大峪山植扈行閱視欲疏爭不果明年還
朝御史丁此呂論禮部侍郎何雒文侍講高啓愚舉
場私張嗣修懋修敬修坐謫植及同官不平交章劾
吏部尚書楊巍語侵大學士申時行上諭內閣超擢
植等五人植尋劾刑部尚書潘季馴季馴坐削籍上
遂手詔吏部擢植添註太僕少卿廷臣多忌之十三
年四月旱御史蔡系周劾植言旱實由植語多狂誕
御史龔懋賢孫愈賢繼之光祿少卿江東之尚寶少

卿羊可立為力辨植求去不許御史龔仲慶又劾之
上惡其排擠出之外植等遂合疏言大峪地有石如
屏風禮部尚書徐學謨以私意主其議申時行以親
故贊其成奪俸半歲御史韓國楨給事中陳與郊王
敬民等因迭攻之貶戶部員外郎尋調綏德知州引
疾歸起知阮州二十六年屢官右僉都御史巡撫遼
東墾土積粟得田四萬畝歲獲糧萬石戶部推其法
九邊以倭退請因師旋還主客銳卒復舊遼陽不果

行奏稅監高淮貪暴請召還不報後淮激變言植阻撓植疏辨乞休慰留之明年巡按御史王業弘言錦義失律詔聽勘勘已命家居聽用卒贈兵部右侍郎王家璧山陰人家屏從弟萬厯己卯舉人薊州府通判性廉介不為矯激時有誣陷良善力為昭雪署嘉定太倉篆興除釐剔洞悉民艱以直道忤時改除河間督運楊村畿輔大旱河水涸躬率畚築決渠引水使者旌其勞勩以疾歸

陸敏捷大同人萬厯壬午舉人性率真達於政事任狄道知縣興利剔弊多善政陞德州知州稅監陳增馬堂一地雙科商民併苦敏捷調處歸併遷河間同知時靜海縣饑民煽禍敏捷擒首惡散黨餘不動聲色而定謝掣鹽常例重修天津城築重隄護運河迄今猶稱陸隄

李杜大同人萬厯丙戌進士幼穎異十三為縣庠弟子員十九舉於鄉二十成進士授遵化知縣威惠服人

會巡撫恠餉奸弁喉譁者數千人擐甲四集杜諭以恩信軍羅拜受命詣撫力請餉撫以庫竭為詞杜用縣儲給之一方以寧陞禮部郎卒於官

張爾基大同人萬厯壬辰進士三任知縣政清訟理民歌其惠以卓異行取陝西道御史指陳時政直聲震中外巡按貴州戡定南蠻轉山東僉事陞榆林副使得軍士心以功加右布政在告數年起寧紹道

潘文寧化人萬厯乙未進士知陝西漢中府案無塵牘

斷獄片言居要左右不得關其說月朔與諸生講程
朱業名士多出其門礦賊俞士乾聚衆數載為暴文
設策招安令充牙兵未一載復橫文以計擒之漠中
獲安堵

何廷魁字汝謙咸遠衛人萬厯二十九年進士授涇縣
知縣調寧晉遷刑部主事歷歸德衛輝河南知府西
寧副使坐考功法復為叅平知府遷副使分巡遼經
略納降爭不聽同事者遣孥歸廷魁曰吾不敢為民

望廷魁論兵事經略竝不從及潰懷印率其妾高氏
金氏投井死婢僕從死者六人贈光祿卿再贈大理
卿賜祭葬謚忠愍世廕錦衣百戶

馬呈秀大同人萬厯甲辰進士初告終養授評事遷寺
正恤刑雲貴全活甚衆出守延安捐俸治河患時有
邊警呈秀單騎為士卒先邊境無虞治大猾孫養蒙
尋備兵商雒陞漳南叅政山寇起伏不常設謀擒斬
民賴以寧至今立祠祀之

王從義大同人天性孝友端方廉介登萬曆丁未進士授評事多所平反歷郎中陞東昌知府以勸農興學為首務修濬城池後兵火頻仍卒恃以無恐士民因勒石建祠祀之秩滿以副使備兵壽張會徐鴻儒變多方弭制殲渠魁而安善良全活數萬人究民至今頌之遷河南叅政未幾賊黨復萌以右布政備兵沂州嚴立保伍一境帖然擢河南左布政持身廉約禁絕饋遺戊辰晉副都御史巡撫山東適歲祲招撫流

移數萬人開墾荒田擊除大猾不遺餘力尋以協餉功進戶部右侍郎引疾歸總督楊嗣昌特舉不起母喪哀毀骨立幾至於絕

李懷信大同人由世廕厯都指揮僉事掌山西都司廉勤數被推薦萬厯中遷延綏中路叅將進定邊副總兵勇敢有謀寇入輒敗四十三年擢甘肅總兵官延人為立生祠松山寇入掠蘆溝墩邀擊大敗之斬首三百有奇獲駝馬甲仗無算已復分三道犯鎮番諸

堡亦分過之寇引還將士尾其後獲首功百九十有
奇自後寇每入多失利去威名著河西四十七年充
援勦總兵官馳赴遼經略熊廷弼令偕柴國柱賀世
賢以四萬人守潘煖兔炒花謀入廷弼急移懷信戍
首山寇不敢入旋引疾去天啓二年起鎮大同明年
罷後追錄邊功進左都督卒

梁琦應州人萬厯中以世襲指揮使官寧夏遊擊李承
恩之亂琦適以事他出聞變亟返入城將為討賊計

賊黨許朝土文秀等閉門拒守而縛其家人以脇之
琦大怒持刀奪門驅衆入馬蹶為土文秀所執磔殺
之至死罵不絕口事聞贈都督立廟賜額命所司春
秋祠之

宋國賓山陰人萬厯中平魯衛叅將倜儻負奇氣蒞官
明斥堠嚴刁斗時簡練於隊長之侵牟者嚴治不貸
久之角巾歸子偉沉雄多勇略官洮西副總兵晉延
綏總兵崇禎初移鎮關門甲申之變服鴆死

楊茂春大同人驍勇熟韜略萬厯中任指揮僉事累官
太原總兵天啓初移鎮薊門敵人望風讐伏崇禎初
以宿將召對便殿詢制禦方略特命鎮守大同邊人
無烽火驚後晉秩都督同知賜蟒玉

李柄大同人天啓壬戌進士授中書選御史巡節慎庫
一塵不染條上諸邊務稱旨出巡浙修海隄禦海寇
為永賴計差滿贖金籍於官上將遣內臣出鎮力諫
止之繼巡雲南卒於官中外悼惜

李櫟大同人崇禎初累官遵化中營叅將性忠勇每戰輒先登為麾下倡二年大兵入關督所部勤王擢甲橫刀大呼徑進以衆寡不敵陷陣以死後得其屍猶勃勃如生事聞贈都督僉事

曹文詔大同人勇毅有智略從軍遼左歷事熊廷弼孫承宗積功至遊擊崇禎二年冬從袁宗煥入衛三年二月總理馬世龍昇所賜尚方劍令率叅將都司等伏玉田枯樹洪橋鏖戰有功遷叅將又從世龍有大

安城鮎關之役加都督僉事七月擢延綏東路副總
兵四年四月克河曲城追斬王嘉印以功擢臨洮總
兵官獲黠燈子西旋馘李老柴及其黨一條龍又分
勦綏德宜君清澗米脂賊戰懷寧川黑泉峪綿湖峪
封家溝皆大捷埽地王授首又從廊州間道與總兵
楊嘉謨副將王性善合軍五年三月大戰西濠斬首
千級生擒杜三楊老柴餘黨攻莊浪走高山游擊曹
變蛟等諜而上賊潰走變蛟者文詔從子也追擊屢

敗之賊逸出清水文詔縱反間給其黨殺紅軍友遂
蹙敗之水落城追至靜寧州變蛟先登唐毛山殄其
衆可天飛劉道江遂圍合水文詔往救賊匿精銳以
千騎逆戰誘抵南原伏大起城上人言曹將軍已歿
文詔持矛左右突匹馬縈萬衆中諸軍望見夾擊賊
大敗僵屍蔽野餘走銅川橋文詔率變蛟等追及之
大戰陷陣賊復大敗尋會破賊甘泉之虎兕凹餘賊
分竄追擊之隴州平鳳間十月三戰三敗之遂蹙賊

耀州錐子山其黨殺獨行狼郝臨庵以降關中巨寇
略平巡撫范復粹彙奏首功三萬六千六百有奇文
詔功第一巡按吳姓推獎尤甚兵部抑其功卒不敘
時賊見陝兵盛多流入山西御史張宸極請勅令入
晉協勦於是命陝西山西諸將竝受節制六年斬混
世王五臺孟定襄壽陽賊盡平太原賊幾盡又屢敗
之澤沁遼潞間山西賊乃避文詔鋒多流入河北命
移師往討遂率五營軍夜襲破賊於林縣七月大敗

懷慶賊馘其魁滾地龍又追斬老回回於濟源而四
川石柱土官馬鳳儀軍敗沒候家莊賴文詔馳退賊
河南巡按反劾之部議文詔怙勝而驕乃調之大同
七年七月駐懷仁八月移駐鎮城十一月偕制撫竝
充軍邊衛山西巡撫吳甡請用之晉中乃命為援勦
總兵官八年三月八省總督聞文詔整兵南大喜即
令擊賊隨州文詔追斬賊三百八十有奇四月令由
閬鄉取山路至商雒拊其背而遣之文詔躍馬去五

月五日抵商州賊去城三十里營火滿山文詔夜半率從子叅將變蛟守備昂蛟都司白廣恩等敗賊深林中追至金嶺川賊據險以千騎逆戰變蛟大呼陷陣諸軍竝進賊敗走變蛟勇冠三軍賊中聞大小曹將軍名皆怖懼已而自漢中馳赴靜寧泰安清水秦州間賊衆且二十萬文詔所部合張全昌張外嘉軍止六十六月前鋒中軍劉弘烈被執俄副將艾萬年柳國鎮復戰死文詔聞之瞑目大罵亟詣總督請

行總督喜而無兵可策應文詔乃以三千人自寧州
進遇賊真寧之湫頭鎮變蛟先登斬首五百追三十
里文詔率步兵繼之賊伏數萬騎合圍矢蜩集有小
卒縛急大呼曰將軍救我賊中叛卒識之悉賊曰此
曹總兵也賊喜圍益急文詔左右跳盪手擊殺數十
人轉鬪數里力不支拔刀自刎死游擊平安以下死
者二十餘人總督聞拊膺大哭上亦痛悼贈太子太
保左都督賜祭葬世廕指揮食事有司建祠春秋致

祭文詔弟文耀從兄征討數有功河曲之戰斬獲多
後擊賊忻州戰死城下詔予贈恤

曹變蛟大同人文詔從子也幼從文詔以功厯官游擊
崇禎四年從復河曲五年連破紅軍友等於張麻村
隴安水落城毛唐山又破劉道江等於銅川橋勇冠
諸軍御史吳甡薦為叅將文詔移山西從戰輒勝文
詔改鎮大同山西巡撫許鼎臣言晉賊紫金梁雖死
老回回過天星大天王蝎子塊闖塌天諸渠未滅變

蛟驍勇絕人麾下健兒千百才乃文詔亞乞留晉中
從之七年南征湖廣賊又北援文詔於大同冬文詔
謫戍亦以疾歸八年文詔起討陝西賊變蛟以故官
從大捷金嶺川麇湫頭鎮皆為軍鋒文詔歿收潰卒
復成一軍總督薦為副總兵置麾下破賊關山鎮追
奔三十餘里又追闖王高迎祥戰鳳翔官亭斬七百
餘級尋擊敗迎祥於乾州迎祥中矢走斬三百五十
餘級已而迎祥夜出朱陽關賴變蛟陷陣軍獲金九

年破闖將澄城追至靖虜衛轉戰安定會寧抵靜寧
固寧賊屢挫秋擊敗混天星於蒲城賊西走復追破
之十年二月部卒許忠勾賊變蛟聞亂返賊遂遁四
月賊入洮岷階文山諸將力戰郭家壩賊死傷無算
九月擢都督僉事為臨洮總兵官降小紅狼十月賊
入蜀從總督由沔縣抵廣元賊已復還還軍邀擊斬
五百餘級十一年四月鎬五官戴罪辦賊追闖將李
自成於番地斬六千七百級有奇轉戰千餘里不解

甲者二十七晝夜賊止餘男婦三千潰入塞還勦之
賊敗入山不敢出六月扼六隊賊於泰州自成六隊
等將還走階文及西鄉憚變蛟六隊祈總管皆降惟
自成東遁變蛟窮追而設三覆於潼關南原追及大
呼斫賊賊奔入伏中大敗死者相枕藉村民用大棒
擊逃者自成妻女盡失僅從七人竄餘皆降時關中
賊盡平錄功晉左都督十一月從入衛十一年留屯
遵化陝督鄭崇儉請變蛟軍西還不許旋用為東協

總兵官十四年三月出關營松山北乳峰山旋急入
松山固守十五年二月殉城贈榮祿大夫太子少保
世廕錦衣指揮僉事

傅應鳳字菊庵山陰人舉人崇禎九年由內鄉調澄城
寬猛合宜遇士雍雍有禮十三年饑民倡亂賑贍勸
貸勦撫得法陞淮安府同知

吳從義字裕強山陰人崇禎庚辰進士授長安知縣時
闖賊蹂楚豫間漸及秦境督師孫傳庭總七省兵駐

省會從義出已資供征調費復設法賑貸闖賊入關
從撫臬守禦慷慨乘障日夜無倦色城破入關帝廟
引刀自刺不死投於井賊至將援以上大罵不止賊
怒推石斃之

張爾塾大同人丰姿魁岸慷慨有氣節精騎射嫻韜略
居家事母以孝稱鄉里爭訟率一言決定人服其公
以功陞撫標守備崇禎癸未都城戒嚴奉令領健卒
五百為前鋒至蘆溝橋陡遇兵数千直前搏戰及圍

之數重乃下馬步鬪箭不虛發身被重創奮擊愈厲
會日暮救援不至顧左右止存二三人乃仰天大呼
曰見危授命吾得死所矣遂力戰死事聞贈卹後次
子習舉業科甲聯登人以為忠孝之報

劉永昌安東衛人世襲指揮使歷陞江南總兵崇禎間
流寇猖獗奉命勦賊鎮守江淮十七年闖賊陷應州
執其父令招永昌永昌曰國破父執生不能殺賊惟
有一死以報朝廷耳因檢軍冊置案上三鼓投江死

後人為樹碑題曰劉大將軍盡節處

馬振麟陽和人寧武遊擊闖賊陷城督兵巷戰與周將
軍俱死

張岩字維石陽和人宣府叅將陣亡

國朝

鮑承先應州人負大略嘗上書請祖堯舜以行仁宗湯
武以除暴

世祖章皇帝召見殿上

賜蟒幣鞍馬尋授內秘書院大學士勦撫諸方略多所規畫

特畀世職以彰功宗承先事繼母孝性簡潔食粗糲衣大布衣第舍裁蔽風雨居鄉退讓歲歉傾橐賑之又嘗修府縣學創桑乾河石橋往來者胥頌其德

李永鏞大同人順治六年由選貢知房縣居縣西羊角寨招撫流亡賊潛伏山谷一日夜行三百里襲之被執不屈而死

李國英字培之滿洲籍大同人少倜儻志氣岸然從

肅王收四川以才略擢巡撫關荊棘招流移蜀疆漸
定晉尚書總督川陝以秦事付陝撫再統師入川大
興屯田以牛種數萬給墾者軍儲獲充又疏設學政
頒憲綱撫軍士復遐疆招來譚姓大族請封侯伯者
四人世所傳三譚也蕩平巴巫逋寇與士卒同甘苦
廬帳箚牀外無長物俸精盡供椎牛餉士之用秦蜀
胥倚為樞壁晉太子少保以勞成疾臥理二載卒於

官

杜國慶大同人以武舉累官沂州鎮標遊擊饒材勇精騎射慷慨許國嘗有死綏之志康熙六年土寇竊發率其黨攻城武縣國慶馳往救之擒渠魁王心茂王希純等已復攻定陶定陶國慶汎地也偕縣令李文學殫力防禦一日遇賊振臂大呼徑入其陣文學督兵繼之賊黨披靡而援兵不至賊復合圍甚堅國慶屢馳突不得出與文學偕死巡撫巡按合疏以聞得

卹典如例

周子德廣靈人邑弟子員幼偕弟子道受學於父之屏
姜逆之亂賊黨徇郡縣至廣靈范令發愚乘城固守
檄徵鄉勇之屏督衆往子德請從之屏不許則曰安
有父行而子不衛者子道亦慨然起曰安有父兄胥
行而子弟不衛者之屏口不言心獨喜謂此真吾子
也賊猝邀擊於塗二人奮長矛振臂大呼逐賊旋陷
入賊壘被執不屈死之子德以書生遇難捐軀有烈

丈夫槩弟子道亦慷慨偕死君子以為難兄難弟焉
李冀廣靈人邑弟子員周之屏妻弟之子也冀亟游周
氏父子間比賊黨攻縣城令徵兵衆冀肯前冀憤甚
尋聞周氏父子往請曰昔人耻獨為君子冀願分餘
烈于德曰得子同往甚善及周氏兄弟陷於賊冀馳
救之為賊所殺

徐喆字聯吉廣昌人以拔貢生考選州判念母老蘄得
祿養降選縣丞注浙江之蘭溪奉母如官既蒞任能

飲佐令不逮循聲雅著署武義縣事會耿逆據處州
來寇金衢時守弁張奇章潛通賊詰方誓死登陴設
守禦具遽為奇章所縛奪縣印誘逼同亂詰責以大
義奇章慙甚已而環守以兵且將械入賊巢詰乘間
自經死督府李之芳以狀聞

贈浙江按察司僉事

予祭一壇給墳價銀百兩廕子恭入監讀書


諭祭贈浙江按察司僉事徐詰文

康熙十六年

烈士成仁齎志而歿忠臣報國捐軀以從爾徐喆矢志
忠貞服官敬慎值逆賊之煽亂勵臣節以彌堅臨難不
屈甘心殞命朕用悼焉特頒葬祭以慰幽魂爾如有知
尚克歆饗

穆生輝天鎮人驍勇有智略聞人道斬將奪旗事輒慨
然神往起行間洊歷叅副將所向有功總兵鄖陽屢
以軍功世襲拖沙喇哈番會小醜鷓張督士卒討之
戰既合不利衆皆殊死鬪兵盡矢窮猶揮刀馘斬數

十人卒以死殉人胥羨為奇偉男子



山西通志卷一百十八

欽定四庫全書

史部

山西通志卷一百十九

詳校官給事中臣王鍾健

檢討臣德生覆勘

總校官進士臣朱鈐

校對官學正臣湯垣

謄錄監生臣劉廷勳

欽定四庫全書

山西通志卷一百十九

人物

十九

朔平府

漠

聶壹馬邑人韓安國等將車騎材官三十餘萬匿馬邑
空谷中陰使聶壹為間亡入匈奴謂單于曰吾能斬
馬邑令丞以城降財物可盡得也單于然而許之聶

壹乃詐斬罪首懸城單于果穿塞將十萬衆入武州
得鴈門尉史知其詐遂引兵遁去

魏

張遼字文遠鴈門馬邑人少為郡吏并州刺史丁原以
遼武力過人召為從事後遞屬何進董卓呂布遷騎
都尉布東奔徐州領魯相時年二十八魏武破布遼
將其衆降拜中郎將賜爵關內侯數有戰功遷裨將
軍袁紹破別遣定魯國諸縣與夏侯淵圍昌稀於東

海糧盡議引軍還遼日數日來猗輒屬目視遼又射矢更猗遼欲挑與語儻可誘也乃使謂猗曰公使遼傳命猗果下遼為說魏武神武方以德懷四方先附者受賞猗許降遼遂單身上三公山入猗家拜妻子猗喜隨詣魏武魏武責遼曰此非大將法遼謝曰以明公威信猗必不敢害故也從討袁譚袁尚於黎陽有功行中堅將軍從攻鄴拔陰安徙其民河南復從破鄴招降緣山諸賊及黑山孫輕等別將徇海濱破

海外賊柳毅還魏武自出迎引其載以遼為盪寇將
軍復別擊定江夏諸縣還屯臨潁封都亭侯從征柳
城卒遇寇氣甚奮魏武壯之自以所持麾授遼遂擊
大破之斬蹋頓復遣屯長社臨發軍中夜驚亂起火
遼謂左右曰勿動是必有造變者欲以動亂人耳乃
令不反者安坐遼將親兵數十人中陣而立有頃定
即得首謀殺之命督張郃朱蓋等討陳蘭蘭偕梅成
轉入瀾天柱山壁其上遼欲進擊諸將難之遼曰此

所謂一與一勇者得前耳遂進到山下安營攻斬蘭
成盡虜其衆魏武論諸將功曰登天山履峻險以取
蘭成盪寇功也增邑假節與樂進李典等將七十餘
人屯合肥及征張魯教與護軍薛悌署函邊曰賊至
乃發俄而孫權率十萬衆圍合肥乃共發教曰若權
至張李將軍出戰樂將軍守護軍勿得與戰諸將皆
疑遼曰公遠征在外比救至彼破我必矣是以教指
及其未合逆擊之折其盛勢以安衆心然後可守也

成敗之機在此一戰諸君何疑於是夜募敢從士得
八百人椎牛饗將士明日大戰平旦遼被甲持戟先
登陷陣殺數十人斬二將大呼名衝壘入至權麾下
權大驚走登高冢以長戟自守遼叱權下戰權不敢
動望見遼衆少聚圍數重遼左右麾圍直前急擊圍
開將麾下數十人得出餘衆號呼曰將軍棄我乎復
還突圍拔出餘衆權人馬皆披靡自旦戰至日中吳
人奪氣還修守備衆心乃安權守合肥十餘日引退

遼率諸軍追擊幾復獲權魏武大壯遼拜征東將軍
建安二十一年伐權到合肥循行遼戰處歎息者良
久乃增遼兵徙屯居巢復召遼還救曹仁會摩陂魏
武乘輦出勞之還屯陳郡文帝即王位轉前將軍賜
帛千匹穀萬斛封兄汎及一子列侯還屯合肥進都
鄉侯給遼母輿車及兵馬送遼家詣屯勅母至尊從
出迎將吏皆羅拜道側觀者榮之魏初封晉陽侯增
邑千戶并前二千六百戶黃初二年會建始殿親問

破吳意狀上歎息顧左右曰此亦古之召虎也為起第舍又特為遼母作殿以遼軍皆為虎賁還屯雍丘遼疾使視疾道路相屬又迎遼就行在所車駕親臨執其手賜以御衣太官日送御食疾小差還屯遣乘舟與曹休至海陵臨江權勅諸將張遼雖病不可當也慎之是歲破權將呂範卒於江都上為流涕謚曰剛子虎嗣六年詔曰合肥之役遼典以步卒八百破賊十萬自古用兵未之有也使賊至今奪氣可謂國

之爪牙矣其分遼典邑各百戶賜一子爵關內侯虎
為偏將軍卒子統嗣

北魏

叱列延慶代西部人娶尔朱世隆姊普泰初兼尚書左
僕射山東行臺封北海郡公時幽州刺史劉靈助舉
兵節閭以延慶與大都督侯深於定州討之深以靈
助善占百姓信惑欲還師入據關拒嶮以待其變延
慶以靈助庸人彼皆恃其妖術寧官戮力致死宜詭

言西歸可襲而擒深從之乃出頓城西聲云將還詰
朝造靈助壘遂破擒之韓陵敗與余朱仲遠走度石
濟仲遠南竄延慶北降後為中軍大都督孝武之西
齊神武殺之

北齊

斛律平金兄少便弓馬神武起義以都督從皇建初封
定陽郡公後為青州刺史卒贈太尉

斛律金字阿六敦朔州敕勒部人高祖倍侯利魏道武

時內附位大羽真賜爵孟都公祖幡地斤殿中尚書
父那瓌光祿大夫贈司空金性敦直善騎射行兵用
匈奴法望塵知馬步多少嗅地知軍度遠近為軍主
破六韓拔陵之亂統所部詣雲州除第二領人酋長
稍引南出黃瓜堆為杜洛周所破與兄平歸介朱榮
為別將孝莊立賜爵阜城男位金紫光祿大夫贊成
齊神武大謀太昌初為汾州刺史進侯從破紇豆陵
於河西沙苑之役神武以地阨少却軍為西師所乘

遂亂張華原點兵莫有應者神武將集兵便戰金曰
衆散將離其勢不可復用宜急向河東神武據鞍未
動金以鞭拂馬神武乃還是役也無金先請還幾殆
高仲密西附從破周文於洛陽還除大司馬改封石城
郡公神武重其古質每誡文襄曰有讒此人者勿信之
文襄嗣事為肆州刺史文宣初封咸陽郡王天保三
年就除太師四年解州以太師還晉陽車駕幸其第
六宮及諸王盡從置酒極夜方罷帝欣甚詔金第二

子豐樂為武衛大將軍賜帛五千匹謂曰公元勳佐
命父子忠誠朕當結以婚姻永為藩衛仍詔金孫武
都尚義寧公主帝從皇太后幸金宅皇后太子諸王
皆從後蠕蠕破散慮其犯塞詔金屯兵白道以備之
多所俘獲并表陳虜可取狀文宣乃與金共討之進
位右丞相食齊州幹遷左丞相孝昭初納其孫女為
皇太子妃詔朝見聽乘步挽車至階武成初禮遇彌
重又納其孫女為太子妃金長子光大將軍次子羨

及孫武都並開府儀同三司出鎮方岳其餘子孫皆
封侯貴達一門一皇后二太子妃三公主尊寵當時
莫比金嘗謂光曰我雖不讀書聞古來外戚梁冀等
無不傾滅女若有寵諸貴人妬女若無寵天子嫌之
我家直以立勲抱忠致富貴豈藉女也辭不獲免常
以為憂天統三年卒年八十贈假黃鉞相國太尉公
贈錢百萬諡曰武

庫狄干善無人曾祖越豆眷魏道武時以功割善無之

西臘汗山地方百里以處之後北遷朔方千鯁直少
言有武藝正光初授將軍宿衛於內孝昌元年奔雲
中刺史費穆送於余朱榮隨入洛後從神武起兵破
韓陵封廣平縣公進郡公轉太保太傅神武討高仲
密為大都督前驅千上道不過家見侯景不遑食景
使騎追饋之時周文自將兵至洛陽軍容甚盛諸將
未欲南度干決計濟河神武大兵繼至遂大破之還
為定州刺史清約自居不為吏人所患遷太師天平

初以千元勲佐命封章武郡王轉太宰千尚神武妹
樂陵長公主以親地見待常總大衆威望之重為諸
將所伏而最為嚴猛曾詣京師魏謩王元孝友於公
門言戲千正色責之時人稱善卒贈假黃鉞太宰給
輜輶車謚曰景烈皇建初配享神武廟庭子伏敬位
儀同三司卒

蔡儁廬寧石門人父普守五原有功拜寧朔將軍卒贈
燕州刺史儁豪爽有膽畧齊神武微時深相親附神

武謀誅杜洛周僞預其計事泄歸命朱榮從入洛又
從破葛榮平元顥封烏洛縣男隨神武舉義平鄴破
韓陵並有戰功進爵侯出為齊州刺史為政嚴暴然
亦明解吏人畏服之性好賓客頗稱施惠天平中卒
於揚州刺史贈尚書令司空公謚威武齊初祭其墓
皇建初配享神武廟庭

皮景和琅琊下邳人父慶賓魏淮南王開府中兵參軍
家廣寧之石門縣景和少通敏善騎射初以親信事

神武後征步落稽疑有伏將五六騎深入一谷遇賊
百餘射數十人莫不應弦而倒神武嘗令射野豕一
箭獲之深見賞異除庫直正都督天保初授通州刺
史封永寧縣子從襲庫莫奚度黃龍征契丹定稽胡
討蠕蠕每有戰功累遷殿中尚書侍中景和兼長吏
事性識平均周通好後常令接聘使每與同射百發
百中甚見推重武平中恒令案覆詔獄據理執正由
是過無枉濫後除特進封廣漢郡公遷領軍將軍琅

瑯王殺和士開兵指西闕請後主出千秋門自號令
事平除尚書左僕射陳將吳明徹寇淮南令景和拒
之除領軍大將軍封文城郡王平陽人鄭子饒詐設
齋會用米麵不多供贍甚廣魏衛問信之潛度河號
長樂王破乘氏縣景和遣騎擊破之吳明徹圍壽陽
與賀拔伏恩救之他将多傾覆唯景和金軍而還除
尚書令武平六年卒贈太尉錄尚書長子信機悟有
風神位開府儀同三司武衛將軍勲貴子弟中稱有

識鑒周授上開府庫正中大夫隋開皇中卒於洮州
刺史

尉景字士真善無人性溫厚頗有俠氣初從杜洛周
朱榮以軍功封博野縣伯後從神武起兵韓陵之戰
唯景失利神武留景鎮鄴進封公景妻常山君神武
姊也每有軍事景與庫狄干常被委重轉冀州刺史
改封長樂郡公歷太保太傅坐匿亡見禁止使崔暹
謂文襄曰語阿惠兒富貴欲殺我邪神武泣詣闕曰

臣非尉景無以至今日三請乃許黜為驃騎大將軍
開府儀同三司神武造景景恚臥不動叫曰殺我時
趣邪常山君曰老人去死近何忍煎迫至此又曰我
為爾汲水舐生因出其掌神武撫景為之屈膝先是
景有果下馬文襄求之景不與曰一馬亦不得畜耶
神武杖文襄常山君泣救之景曰小兒慣去放使作
心腹何須乾啼濕哭不聽打耶尋授青州刺史操行
頗改百姓安之徵授大司馬卒於州贈太師尚書令

齊初以景元勲祭其墓皇建初配享神武廟追封長樂王子粲少歷顯職天保中封庫狄干等為王粲以父不預王爵閉門不朝帝使就宅問之隔門謂使人曰天子不封粲父作王粲不如死文宣親詣其宅慰之尋追封景長樂王粲襲位司徒太傅卒于世辯嗣隋開皇中卒於浙州刺史

竇泰字世寧太安捍殊人本出清河觀津胄祖羅魏統萬鎮將因居北邊父樂魏末拔陵為亂與鎮將楊鈞

固守遇害追贈司徒泰善騎射有勇畧父兄戰歿於
鎮身負骸骨歸余朱榮從討邢杲賜爵廣阿子神武
為晉州請為鎮城都督參謀軍事累遷侍中京畿大
都督尋領御史中尉泰以勲戚居臺百寮憚之天平
三年神武西伐令泰自潼關入四年泰至小關為周
文帝所襲衆盡沒泰自殺贈大司馬太尉錄尚書事
諡武貞泰妻武明妻后妹雖以親見待而功名自建
齊初祭其墓皇建初配享神武廟庭子孝嗣位儀同

三司

万俟卨字普撥太平人雄果有武力正光中累遷第二鎮領人酋長孝武初封清水郡公隨入關拜司空齊神武平夏州普自覆鉢城率部歸神武神武躬自迎接封河西郡公位太尉卒贈太師大司馬錄尚書事万俟洛字受洛干普子隨孝武入關除尚書左僕射天平中隨父東歸封建昌郡公再遷領軍將軍初神武以其父普尊老特崇禮之嘗親扶上馬洛免冠稽首

願出萬死力以報深恩及河陰之戰諸軍北渡橋洛
一軍不動謂西人曰万俟受洛干在此能來可來也
西人畏而去之神武名其所營地為迴洛洛慷慨有
氣節勇銳冠世卒贈太師大司馬太尉錄尚書諡曰
武

韓賢字普賢廣寧石門人壯健有武勇為汭朱度律帳
內都督封汾陽縣伯後為廣州刺史及齊神武起義
度律以賢素為神武所知遣使徵之不願去乃密遣

羣蠻多舉烽若有寇至得停賢仍潛通誠於神武後
拜建州刺史天平初為洛州刺史州人韓木蘭等起
兵賢破之親自案檢收甲仗有一賊窘迫忽起斫賢
卒贈尚書令司空子裔嗣

尉長命太安狄那人父顯魏代郡太守長命性和厚有
器識參預齊神武起兵破韓陵拜安南將軍除東南
道大都督平樊于鵠徙幽州刺史督安平二州雖多
聚斂然以恩撫人卒贈司空謚武壯子興字敬興使

弓馬有武藝位冠軍將軍

徐遠廣寧人為丞相騎兵叅軍事深為神武所知累遷
東楚州刺史政有恩惠郭邑大火城人亡產業遠躬
自赴救對之流涕仍為經營皆得安立卒於衛尉卿
任祥字延敬廣寧人和厚有器度葛榮敗先降拜廣寧
太守賜爵西河縣公隨齊神武起兵封魏郡公後兼
尚書左僕射進開府儀同三司寬和接物人士稱之
及斛斯椿讞發棄官歸神武天平初拜侍中遷徐州

刺史有受納而政不殘潁川長史賀若徽附西魏祥
戰失利還與侯景高昂共攻拔潁川元象元年卒贈
太尉公錄尚書事子冑天平中為東郡太守興和末
預弒朱文暢謀誅

莫多婁貸文太安狄那人驍果有膽氣從神武起兵破
廣阿封石城縣子從破韓陵進爵侯從平赤嶺嶺獲
爾朱兆屍天平中進爵公晉州刺史元象初除車騎
大將軍儀同三司南道大都督從攻獨孤信於金墉

城請率所部擊其前鋒以輕騎一千軍前斥堠死於
周軍贈尚書左僕射司徒公

斛律羌舉太安人少驍果從尒朱兆兆破乃歸神武神
武以其忠於所事亦加嗟賞天平中除大都督從戰
沙苑羌舉曰黑獺若欲固守無糧援可恃今揣其情
欲一死決有同獒犬或能噬人且渭曲土濇無所用
力若不與戰徑趣咸陽咸陽空虛可不戰而剋拔其
根本則黑獺之首可懸軍門時諸將議有異同遂戰

於渭曲軍敗績後封密縣侯為東夏州刺史卒贈儀
同三司

潘樂字相貴廣寧石門人本廣宗大族分鎮北邊因家
焉父永有技藝龍廣宗男樂寬厚有膽畧葛榮敗
隨尔朱榮為別將討元顥以功封敷城縣男齊神武
出牧晉州引為鎮城都將後從破廣阿進廣宗縣伯
累以軍功拜東雍州刺史神武嘗議廢州樂以東雍
地帶山河境連胡蜀形勝之會不可棄也遂如故後

從破周師於河陰議追之令追者在西不願者東唯
樂與劉豐居西神武善之以衆不同而止改封金門
郡公文宣嗣事鎮河陽破西魏將楊檟等時帝以懷
州刺史平鑒等所築城深入敵境欲棄之樂以軹關
要害必須防固乃更修理增置兵將而還還鎮河陽
拜司空齊初進河東郡王遷司徒周文東至崤陝遣
其行臺侯莫陳崇從齊子嶺趣軹關儀同楊檟從鼓
鐘道出建州陷孤公戍詔樂總大衆禦之樂晝夜兼

行至長子遣儀同韓永興從建州西趣崇崇遂遁又
為南道大都督討侯景樂發石鰲南度百餘里至梁
涇州涇州舊在石梁樂獲其地仍立州又克安州地
除瀛州刺史仍畧淮漢天保六年卒於懸瓠賜假黃
鉞太師大司馬尚書令子子晃嗣沈密謹慤以清靖
自居尚公主拜駙馬都尉武平末為幽州道行臺右
僕射幽州刺史周師將入鄴率突騎數萬赴援至博
知鄴不守詣冀州降授上開府隋大業初卒

暴顯字思祖魏郡廩丘人祖喟為朔州刺史因家焉父
誕恒州刺史樂安公顯幼見一沙門曰大必為良將
貴極人臣及長善騎射從魏孝莊獵一日手獲禽獸
七十三後從齊神武起義累遷北徐州刺史封屯留
公天保中合肥被圍遣顯與步大汗薩等攻梁北徐
州擒其刺史王彊天統中位特進封定陽王卒

庫狄盛字安盛懷朔人性和柔少有武用初為神武親
信都督從征伐累遷幽州刺史封長廣縣公齊受禪

改封華陽縣公後拜特進卒贈太尉公

韓軌字伯年太安狄那人志操深沈喜怒不形於色神武鎮晉州引為鎮城都督及起兵於信都軌贊成大策從破廣阿又從破韓陵陣封平昌縣侯仍督中軍從破赤嶺再遷秦州刺史甚得邊和神武巡秦州欲以軌還仍賜城人戶別絹布兩疋州人田昭等七千戶皆辭不受唯乞留軌神武嘉歎乃留焉頻以軍功進封安德郡公遷瀛州刺史御史糾劾削除官爵

未幾復安德郡公歷中書令司徒齊初封安德郡王
軌妹為神武所納生上黨王渙復以勲庸歷登台鉉
謙恭自處不以富貴驕人後拜大司馬從文宣征蠕
蠕卒贈假黃鉞太宰太師諡曰肅武皇建初配享文
襄廟庭

賀拔仁字天惠善無人以帳內都督從出山東破韓陵
力戰有功天保初封安定郡王歷數州刺史太保太
師右丞相錄尚書事武平元年卒贈假黃鉞相國太

尉錄尚書十二州諸軍事朔州刺史謚曰武

斛律光字明月金長子馬面彪身神爽雄傑少言笑工
騎射初隸侯景彭樂謂高敖曹曰斛律家小兒不可
三度將行後奪人名以庫直事文襄從出野見雁雙
飛使光馳射之以一矢俱落馬年十七從金西征馳
馬射中周長史莫孝暉因擒於陣擢都督封永樂子
文襄校獵洹橋雲表見一大鳥光射中其頸形如車
輪旋轉而下乃鵬也丞相屬邢子高歎曰此射鵬手

也時號落鵬都督齊初別封西安縣子皇建元年進
鉅鹿郡公納其長女為太子妃歷太子太保尚書令
司空司徒河清三年周大司馬尉遲迥齊公憲庸公
王雄等衆十萬攻洛陽光率騎五萬馳往戰於邙山
迥等大敗光親射雄殺之迥憲僅而獲免仍築京觀
策勲遷太尉嘗見椎河水憂曰國家常有吞關隴之
志今日至此而唯玩聲色先是第二女為太子妃天
統元年拜皇后光轉大將軍三年六月父喪詔起復

秋除太保襲咸陽王遷太傅十二月周軍圍洛陽壅
絕糧道武平元年正月詔光率步騎三萬禦之鋒刃
纔交周將宇文傑衆大潰追至宜陽還擊齊王憲等
衆大潰加右丞相并州刺史冬又率步騎五萬於玉
壁築華谷龍門二城與憲相持憲不敢動二年率衆
築平隴等鎮戍十三所周柱國枹罕公普屯威柱國
韋孝寬等來逼平隴戰於汾水大破之周遣柱國紇
十廣畧圍宜陽光率步騎五萬戰於城下取周建安

等四戍捕千餘人而還軍未至鄴敕令便放兵散光
以有功者未得慰勞密表請使宣旨軍仍且進至紫
陌駐營待使帝聞光軍營已逼心甚惡之急令舍人
追光入見然後宣勞散兵拜左丞相別封清河郡公
光嘗在朝堂垂簾而坐祖珽乘馬過其前光怒曰此
人乃敢爾後珽在內省言聲高慢光又怒珽賂其從
奴搥頭曰自公用事相王每夜抱膝歎曰盲人用權
國必破矣珽由是懼穆提婆求娶光庶女不許帝賜

提婆晉陽田光言於朝曰此田神武以來常種禾飼馬以擬寇難今賜人無乃闕軍務也帝又以鄴清風園賜提婆光曰此萊園賜提婆是一家足若不賜提婆便百官足由是祖穆積怨周將韋孝寬懼光作謠言令間漏於鄴曰百升飛上天明月照長安又曰高山不推自崩櫛樹不扶自豎珽續之曰盲老公背上下大斧饒古老母不得語令小兒歌於路提婆聞告其母令萱以饒舌為斥已盲老公謂祖珽也遂協謀

以謠言啟帝曰斛律累世大將明月聲震關西豐樂
威行突厥女為皇后男尚公主謠言可畏帝問韓長
鸞長鸞以為不可事寢光又嘗曰今軍人皆無禪袴
後宮內參一賜數萬匹府藏稍空此是何理受賜者
皆怨珽又通啟求見帝使以庫車載入珽請問唯何
洪珍在側帝語及光洪珍進曰若本無意則可既有
此意不決行萬一事泄如何帝然之而猶豫未決珽
令武都妾兄顏茲告光謀不軌又令曹魏祖奏言上

將星盛不誅恐有災禍既而丞相府佐封士讓密啟
云光前西討還敕令便放兵散光令軍逼帝京將為
不軌不果而止家藏弩甲奴僮千數每使豐樂武都
處陰謀往來帝謂洪珍曰人心亦大聖我前疑其欲
反果然珽請賜光一駿馬令明日乘至東山遊觀須
其來謝因執之及光至引入涼風堂劉桃枝拉殺之
年五十八血流於地剗之迹終不滅下詔稱其反族
之使二千石郎邢祖信籍其家珽問所得物祖信曰

得弓十五張宴射箭一百貝刀七口賜稍二張珽又厲聲曰更得何物曰得棗子枝二十束擬奴僕與人鬪不問曲直即杖一百珽大慙祖信慨然曰好宰相尚死我何惜餘生人皆壯之光居家嚴肅見子弟若君臣性節儉簡聲色不營財利杜絕饋餉門無賓客罕與朝士交言不肖預政事每會議常獨後言言輒合理將有表疏令人執筆口占之務從省實行兵用匈奴卜法吉凶無不中軍營未定終不入幕或竟日

不坐身不脫介冑常為士卒先有罪者唯大杖撻背
未嘗妄殺衆皆爭為之死宜陽之役謂周人曰歸我
七年人不然取爾十倍周人即歸之在西境築定陽
諸城馬上以鞭指畫所取地皆如其言拓地五百里
而不伐己功自結髮從戎未嘗失律深為隣敵懾憚
罪既不彰一旦屠滅朝野惜之周武帝聞光死赦其
境內後入鄴追贈上柱國崇國公指詔書曰此人若
在朕豈得至鄴長子武都特進開府儀同三司梁克

二州刺史遇害於州少子鍾獲免周時襲封崇國公
隋開皇中卒於車騎將軍北史贊光以上將之子
有沉毅之姿戰將兵權暗同韜畧臨敵制勝變化無
方自關河分隔年將四紀以高氏霸王之期屬宇文
草創之日出軍薄伐屢挫兵威而太寧已還東鄰震
弱關西前收巴蜀又殄江陵叶建瓴而用武成并吞
之壯志光每臨戎誓衆式遏邊鄙戰則前無完陣攻
則罕有全城齊氏必致拘原之師秦人無復啟關之

策既而世亂讒勝詐以震主之威治暗時艱自毀藩
籬之固昔李牧之為趙將也北剪胡寇西却秦軍郭
開譖之牧死趙滅其議誅光者豈秦之反間與何同
術而同亡也內令諸將解體外為彊鄰滅讐嗚呼後
之君子可為深戒者與

斛律羨字豐樂金次于少機警善騎射河清三年為都
督幽州刺史突厥十餘萬入總諸將禦之突厥望見
軍容齊整遂不敢戰求款附天統元年五月可汗請

朝貢羨有力焉加行臺僕射羨以寇屢入自庫堆戍
東距海二十餘里凡有險要斬山築城斷谷起障置
立戍邏五十餘所又道高梁水北合易京東會於潞
因以灌田公私獲利在州養馬二千匹部曲三千以
備邊突厥謂之南面可汗四年進行臺尚書令別封
高城縣侯羨厯事數帝稱謹直恒以合門貴盛為憂
武平元年乞解職不許秋進荊山郡王及光誅敕中
領軍賀拔伏恩等十餘人馳驛捕之遣領軍大將軍

鮮于桃枝洛州行臺僕射獨孤永業發定州騎卒進
捕門者來白曰使人衷甲馬汗宜開城門羨曰敕使
豈可疑拒出迎之遂見執遇害臨刑歎曰富貴如此
女為皇后公主滿家常使三百兵何得不敗羨及光
並工騎射少時獵父金命子孫會射而觀之泣曰明
月豐樂用弓不及我諸孫人不及明月豐樂世衰矣
曰今出田光獲少必麗龜達掖羨獲雖多非要害所
光恒蒙賞羨或被捶語人曰明月必背上著箭豐樂

隨處即下手數雖多去兄遠矣聞者服其言

莫多婁敬顯貸文子嗣石城縣公彊直勤幹少以武力
見知恒從斛律光征討數有戰功光每令前驅及夜
巡察或達旦不眠臨敵亦命部分將士深見重位至
開府儀同三司武平七年推立安德王稱尊號安德
敗武將唯敬顯走還鄴授司徒周武帝平鄴斬於閭
闔門外責其不留晉陽也

斛律孝卿羌舉子嗣密縣侯聰敏機悟有風檢武平末

位侍中開府儀同三司封義寧王知內省事典外兵
騎兵機密時典機密者唯孝卿一人差居雅道後主
至齊州為尚書令歸周授儀同大將軍宣納上士隋
開皇中位太府卿戶部尚書

韓晉明軌子嗣安德郡王改封東萊有俠氣留心學問
招飲賓客一席動費萬錢朝廷欲處之要地必以疾
辭告人云廢人飲美酒對名勝安能作刀筆吏披故
紙乎武平末除尚書左僕射百餘日便謝解官

北周

傳伏太安人以戰功至開府永橋領人大都督周武帝
攻河陰伏自永橋夜入中澗城南城陷被圍二旬不
下救至周師還後除東雍州刺史周尅晉州執行臺
尉相貴招伏伏不從周尅并州遣韋孝寬以伏于世
寬來招伏授上大將軍武鄉郡公以金瑪瑙二酒鍾
為信伏不受曰事君有死無二此兒為臣不能竭忠
為子不能盡孝人所讐疾願即斬之以號令天下周

武自鄴還至晉州遣高阿那肱等臨汾召伏伏聞後
主被獲仰天大哭率衆入城於廳事前北面哭良久
然後降周武詰之伏流涕曰臣三世衣食齊家革命
不能自死羞見天地周武親執手曰為臣當若此朕
平齊唯見公一人授上儀同謂後主曰朕前三年決
意取河陰正為傳伏不可動公當時賞授何其薄也
賜伏金酒卮後為岷州刺史卒

赫連達字朔周盛樂人勃勃之後也曾祖庫多汗改姓

杜氏達性剛鯁有胆力少從賀拔岳征討有功賜爵
長廣鄉男及趙貴議迎周文達贊成其議請輕騎迎
之諸將或欲南追賀拔勝或云東告朝廷達曰此皆
遠水不救近火何足道哉謀遂定達馳往周文遂南
赴平涼令達率騎據彈箏峽時百姓奔散軍爭欲掠
之達止之撫以恩信人皆悅附周文嘉之加平東將軍
謂諸將曰當清水公遇禍之日君等性命懸於賊手
杜朔周冒萬死之難遠來見及遂得同雪讐恥勞而

不酬何以勸善賜馬二百匹孝武入關進魏昌縣伯
從破曹泥後復弘農戰沙苑皆有功詔復姓赫連除
雲州刺史進爵公從達奚武攻漢中梁宜豐侯蕭脩
拒守積時後送款賀蘭願德等欲急攻取之達曰不
戰而獲城策之上也無容利其子女貪其財帛如困
獸猶鬪則成敗未可知武遂受脩降遷驃騎大將軍
開府儀同三司加侍中進藍田縣公保定初為大將
軍夏州總管達雖非文吏然性質直遵奉法度輕於

鞭撻而重慎死罪性又廉儉胡人或饋羊達報以繪
帛主司請用官物達曰羊入我廚物出官庫是欺上
也命取私帛與之識者嘉其仁恕尋進樂川郡公柱
國卒子遷嗣位大將軍蒲州刺史

閻慶字仁度河陰人曾祖善魏龍驤將軍雲州鎮將因
家雲州之盛樂郡祖提持節車騎大將軍敦煌鎮都
大將父進有謀畧勇冠當時正光中拜龍驤將軍衛
可環作亂率衆拒守以功拜盛樂郡守慶幼聰敏重

然諾風儀端肅望之儼然以軍功拜步兵校尉中堅將軍齊神武舉兵入洛孝武西遷慶自宜陽歸闕稍遷後將軍封安次縣子以功進爵為伯慶善於綏撫士卒未休未嘗先舍故能盡其死力累遷散騎常侍驃騎大將軍開府儀同三司雲州大中正加侍中賜姓大野氏孝閔踐阼出為河州刺史進爵石保縣公地接戎夷留心撫納頗稱簡惠就拜大將軍進爵太安郡公入為小司空厯雲寧二州刺史慶性寬和不

苛察百姓悅之天和五年晉柱國晉公護母慶之姑也護擅朝而慶未嘗阿附武帝以此重之詔第十二子毗尚帝女清都公主慶位望隆重婚連帝室常以謙慎自守建德二年致仕宣帝以慶先朝耆舊特異恒倫詔靜帝至第問疾太象二年拜上柱國隋初又令皇太子就第問疾開皇二年卒年七十七贈司空謚成長子常先慶卒次子毗嗣

隋

庫狄士文子孫性孤直雖親鄰莫與通在齊襲封章武郡王位領軍將軍周武帝平齊閉門自守帝奇之授開府儀同三司隨州刺史隋初加上開府封湖陂縣子尋拜貝州刺史性清苦不受公料子嘗噉官廚餅加於獄累日杖二百步送還京僮隸無敢出入皆封署其門法令嚴肅吏人股戰嘗入朝上賜公卿入左藏獨口銜絹一匹兩手各持一匹上問之曰臣口手俱足餘無所須上異之別賞遺之時司馬京兆韋

焜清河令河東趙達並苛刻唯長史有惠政謠曰刺
史羅刹政司馬蝮蛇瞋長史含笑判清河生喫人上
聞嘆曰士文暴過毒獸坐免未幾為雍州長史謂人
曰我向法深不能窺候貴要無乃必死此官及下車
執法嚴不避貴戚坐從妹事繫獄憤卒家無餘財

杜彥雲中人父遷徙幽彥勇果善騎射仕周左侍上士
後從陸通擊陳將吳明徹於土州破之又擊叛蠻尅
倉埵白楊二柵斬渠帥進平郢州賊帥樊志拜大都

督尋遷儀同治隆州郡事復拜隴州刺史賜爵永安
縣伯從韋孝寬擊尉遲迴每戰有功賜物三千段奴
婢三十口進上開府改襄武縣侯拜魏郡太守開皇
初授丹州刺史進爵公後六歲徵為左武衛將軍伐
陳為行軍總管軍至南陵敵屯據江岸彥遣儀同樊
子蓋率精兵擊破其柵獲船六百餘艘度江擊南陵
城拔之擒其守將許翼進至新林與韓擒虎合軍陳
平賜物五千段粟六十石進柱國賜子寶安爵昌

陽縣公高智慧亂復以行軍總管從楊素討之別解
江州圍智慧餘黨聚溪洞彥水陸兼進攻錦山陽父
若石壁四洞悉斬渠帥復擊斬賊李阬于彭山擊平
徐州宜豐二洞賜奴婢百餘口拜洪州總管甚有治
名歲餘上曰吾思可以鎮榆林代賀婁子幹者莫過
杜彥徵拜雲州總管突厥來寇輒擒斬之遂不敢至
塞後數年錄前功賜子寶虔爵承縣公十八年征高
麗以行軍總管從漢王至營州令總統五十營事及

還拜朔州總管以彥素為突厥所憚復拜雲州總管
尋因疾徵還卒年六十寶虔大業末為文城郡丞

獨孤羅字羅仁信長子為高氏所囚後寓居中山孤貧
無以自給信入關娶二妻郭氏生子六善穆藏順陁
整崔氏生隋獻皇后及齊亡隋文帝為定州總管獻
皇后遣求羅得之周武帝以羅功臣子徵拜楚安郡
太守文帝為丞相拜儀同隋初追贈羅父后曰羅誠
嫡長不可誣也於是襲趙國公以弟善為河內郡公

穆金泉縣公藏武平縣公阨武喜縣公整千牛備身
擢羅左領將軍遷左衛將軍前後賞賜不可勝計出
為涼州總管進上柱國徵拜左武衛大將軍煬帝改
封蜀國公卒諡恭子纂嗣河陽郡都尉纂弟武都亦
為河陽都尉庶長子開遠大業末為千牛與獨孤盛
力戰閣下為賊所執賊義而捨之

獨孤善字伏阨幼聰慧善騎射以父勲封魏寧縣公授
驃騎大將軍開府儀同三司加侍中進長城郡公周

初除河州刺史保定三年授龍州刺史天和六年襲
河內郡公從東討以功授上開府尋除兗州刺史政
在簡惠百姓安之卒於州贈使持節柱國五州諸軍
事定州刺史子覽嗣右候衛大將軍大業末卒

乞伏慧字令和馬邑鮮卑人祖周魏銀青光祿大夫父
纂金紫光祿大夫並第一領民酋長慧少慷慨便弓
馬齊文襄時為行臺左丞加蕩寇將軍累遷右衛將
軍太僕卿自永寧縣公封宜民郡王與兄貴和一門

二王稱貴顯周平齊授使持節開府儀同大將軍拜
攸飛右旅下大夫轉熊渠中大夫從韋孝寬擊尉悖
於武陟所當皆破授大將軍賜物八百段進柱國賜
爵西河郡公邑三千戶賚物二千三百段請以官爵
讓兄不許論者義之隋初拜曹州刺史曹民多姦隱
戶口簿帳慧下車按察得戶數萬遷涼州總管嚴烽
燧遠斥堠突厥竟不入境轉齊州刺史得隱戶數千
遷壽州總管左轉杞州刺史在職數年遷徐州總管

表求致仕不許俄轉荊州總管又領潭桂總管三十
一州諸軍事俗輕剽躬行樸素見人以簞捕魚出絹
買而放之百姓號其處曰西河公簞轉秦州總管煬
帝初為天水太守大業五年征吐谷渾坐道不整除
名卒

閻毗榆林盛樂人祖進魏本郡太守父慶周上柱國寧
州總管毗七歲襲爵石保縣公邑千戶及長儀貌矜
嚴頗好經史受漢書於蕭該略通大旨工篆草隸尤

精盡周武帝悅之命尚清都公主宣帝初拜儀同三司授千牛左右隋初以技藝侍東宮甚見親待尋拜車騎上嘗遣高颺大閱於龍臺澤惟毗一軍法制肅然賜帛俄兼宗衛率長史加上儀同後坐配大業初以毗性巧諳練舊事詔典軍器尋授朝請郎毗立議輦輅車輿多所增損擢起部郎長城之役毗總其事有事恒岳詔營立壇場尋轉殿內丞從幸張掖郡持節迎勞高昌王母憂尋起令視事自洛口開渠達於

涿郡以通運漕毗督其役明年兼領右翊衛長史營
建臨朔宮征高麗領武賁郎將典宿衛拜朝請大夫
遷殿內少監又領將作少監事率騎二千追斛斯政
政據高麗栢崖城攻二日徵還卒年五十贈殿內監
獨孤盛雲中人上柱國楷弟性剛烈有膽氣以左右從
晉王累遷車騎將軍大業初漸見親待累轉右屯衛
將軍後不及被甲與左右十餘人逆拒亂兵為所殺
越王侗贈光祿大夫紀國公諡曰武節

唐

苑君璋馬邑豪也以趨雄自奮劉武周入寇君璋曰唐以一州兵掇取三輔所向風靡此殆天命非人謀不可爭也太原而南多巖阻今東甲深入無踵軍有失不可償不如連突厥與唐合從南面稱孤上策也武周不聽使守朔州及敗泣曰廢君言乃至此突厥以君璋為大行臺統武周部曲屢寇代州而馬邑困於兵高滿政以城歸唐詔拜朔州總管封榮國公君璋

引突厥攻陷馬邑殺滿政退保恒安子孝政力諫恒安人郭子威曰恒安故王者都山川足以自固君璋然之與突厥寇馬邑犯太原邊人苦之後率所部降拜安州都督封芮國公食五百戶賜帛四千匹君璋不曉書然天資習事歷職有惠稱貞觀中卒

尉遲恭字敬德朔州善陽人隋大業末從軍高陽積閭為朝散大夫劉武周以為偏將與宋金剛南侵得晉澮等州襲破永安王孝基執獨孤懷恩等武德二年

金剛敗敬德合餘衆守介休秦王遣諭之乃與尋相
舉地降引為右一府統軍從擊王世充會尋相叛諸
將疑而囚之屈突通殷開山曰敬德慄敢不即殺後
悔無及王曰敬德必叛寧有後尋相邪釋之引見臥
內曰丈夫意氣相許小嫌不足置胸中我終不以讒
害良士因賜之金曰必欲去以為汝資是日獵榆窠
會世充兵數萬來賊驍將單雄信騎直趨王敬德躍
馬大呼橫刺雄信墜乃翼王出率兵還戰大敗之擒

其將陳智略獲排稍兵六千王顧曰公何相報速邪
賜金銀一篋實建德營板渚令執稍略其壘大呼致
師建德兵出稍引却殺數十人衆益進伏發大破之
世充兄子琬鎧甲華整王望見問誰可取者敬德請
與高甌生梁建方三騎馳往擒琬引其馬以歸賊不
敢動從討劉黑闥賊衆四面合敬德率壯士馳入賊
王乘陣亂乃得出又破徐園朗以功授王府左二副
護軍建成嘗以書招之贈金四一車辭曰敬德起幽

賤久陷逆地秦王實生之方以身徇恩今於殿下無
功其敢當賜若私許則懷二心徇利棄忠殿下亦焉
用之建成怒而止王曰公心如山岳雖積金至斗豈
能移之然恐非自安計巢王果遣壯士刺之敬德開
門安臥賊至不敢入將譖殺之王固爭得免其後隱
巢計日急敬德請先決王言未忍敬德曰人情畏死
衆以死奉王此天授也天與不取反得其咎大王即
不聽請從此亡不能交手蒙戮無忌曰王不從敬德

言敬德亦非王有矣王曰公更圖之敬德曰處事有
疑非智臨難不決非勇今勇士八百人悉入控弦被
甲矣尚何辭後又懇熟勸進計乃定時房元齡杜如
晦被斥在外復往諭之與入計議建成死敬德領騎
七十趨元武門王馬逸墜林下元吉將奪弓窘王敬
德馳叱之元吉走遂射殺之兵戰不解敬德持二首
示之乃去王命往侍上不解甲趨行在曰秦王遣臣
宿衛上意悅請手詔詣軍聽秦王節度內外始定授

東宮左衛率時坐隱巢者百餘家敬德曰今二人已
誅若又窮支黨非取安之道由是普原論功第一賜
絹萬匹舉齊府金帛什器賜焉除右武侯大將軍封
吳國公實封千三百戶授涇州道行軍總管輕騎與突
厥戰涇陽敗之敬德所得財必散士卒然婁直頗以
功自負又廷質大臣得失出為襄州都督累遷同州
刺史嘗侍宴慶善宮有班其上者敬德曰爾何功坐
我上任城王道宗解喻之遂擊道宗目幾眇上不懌

召讓曰朕觀漢史嘗怪高祖時功臣少全者今視卿所為乃知韓彭夷戮非高祖過國之大事惟賞與罰橫恩不可數得勉自修飭敬德頓首謝後改封鄂國
歷廊夏二州都督以老授開府儀同三司朝朔望貞觀十七年詔圖形凌烟閣及將討高麗敬德上言乘輿至遼太子至定州兩京空虛恐有元感之變且小國不足枉萬乘願委之將臣以時摧滅不納詔以本官行太常卿為左一馬軍總管師還復致仕顯慶三

年卒年七十四詔京官五品以上及朝集使赴第臨
弔冊贈司徒并州都督諡曰忠武給班劍羽葆鼓吹
陪葬昭陵敬德晚節謝賓客不與通飭觀治奏清商
樂奉養甚厚又餌雲母粉為方士術延年其戰善避
稍每卑騎入賊羣刺不能傷又能奪稍還刺之齊王
元吉使去刃與校敬德請王加刃而獨去之卒不能
中上嘗問奪稍與避稍孰難對曰奪稍難試使與齊
王戲少選王三失稍遂大愧服

顧彥朗彥暉豐州人並為天德軍小校軍使蔡京以兄弟有封侯相每厚禮之稍進秩同率軍復長安彥朗遷累右衛大將軍光啟中擢拜東川節度使檢校太保同中書門下平章事至劍門陳敬瑄奪其節彥朗不得入保利州敬瑄誣劾彥朗擅興兵掠西境僖宗下詔講和乃得到軍署彥暉漢州刺史初楊守亮忌壁州刺史王建凶暴欲逐之建聞合溪洞酋豪取閬州擊利州刺史走即據二州守亮不能制彥朗與建

雅舊陰助貲饗建攻成都彥朗挾故憾與并力道路
郭梗敬瑄告難於朝詔和解會彥朗卒彥暉自知留
後明年為節度使綿州刺史楊守厚攻梓州彥暉告
急於建建使李簡救之戒曰賊破并取彥暉無須再
往也簡破守厚軍彥暉辭疾不克取景福元年建攻
彥暉明年詔進彥暉檢校司空東川節度使乾寧二
年昭宗在石門督彥暉建赴行在建率兵二十萬次
綿州回襲彥暉彥暉不敢出建遂擊取巴閬蓬渠通

果龍利八州上遣中人為兩川宣諭協和使建奉詔
還而兵不解四年建將革洪率衆五萬取渝昌普三
州壁梓州南敗彥暉兵凡五十戰圍遂固上仍遣左
議大夫李洵諭止建拒命梓有鏡堂世稱其麗彥暉
嘗會諸將堂上養子瑤尤親信彥暉以所佩劍號疥
癬賓佩之使侍左右嘗語將曰與公等生死同之違
者先齒疥癬賓衆曰諾及圍急瑤請聚親信飲得同
死彥暉手殺妻子乃自刎宗族諸將皆死時麾下兵

猶七萬云

五代

周德威字鎮遠小字陽五朔州馬邑人勇而多智能望
塵以知敵數狀貌雄偉笑不改容當梁晉時周陽五
之勇聞天下為晉騎將稍遷鐵林軍使從破王行瑜
遷內衙指揮使梁軍圍太原令軍中曰能生得周陽
五者為刺史有驍將陳章號野叉常乘白馬被朱甲
以自異出入陣中求必生致周陽五晉王戒德威善

備之德威笑曰陳章好大言耳安知刺史非臣作耶
因戒其部兵曰見白馬朱甲者當佯走以避之兩軍
皆陣德威微服雜卒伍中陳章出挑戰德威部下退
走章果奮稍急追德威伺章已過揮鐵鎚擊章墮馬
遂生擒之梁師退德威取慈隰進攻晉絳戰于蒲縣
梁乘勝破汾慈隰既而德威復取之梁攻燕葛從周
取邢洺磁德威出青山口戰於張公橋氏叔琮至榆
次德威敗之於洞渦將五萬人為燕攻梁取潞州遷

代州刺史內外蕃漢馬步軍都指揮使梁軍攻潞圍
以夾城李嗣昭閉潞城距守而德威與梁軍相持營
於亂柳嗣昭與德威素有隙晉王病且革憂之王喪
國中未定而重兵悉屬德威晉人皆恐莊宗召其軍
德威即日還軍太原留其兵城外徒步而入伏梓宮
前慟哭幾絕晉人乃安遂從莊宗復擊梁軍破夾城
與李嗣昭歡如初拜振武節度使同中書門下平章
事又敗梁軍於神山攻晉州再敗梁軍於蒙阮天祐

七年秋梁遣王景仁將七萬人擊趙晉遣德威先屯趙州冬梁軍至栢鄉莊宗自將會德威於石橋進營野河北晉兵少而景仁所將皆梁精兵人馬鎧甲飾以組綉金銀其光耀日晉軍望之色動德威勉其衆曰此汴宋傭販兒徒飾其外耳其中不足懼也其一甲之直數十十得之適足為吾資無徒望而愛之當勉以往取也退而告於莊宗曰梁兵甚銳未可與爭宜少退以待之莊宗曰吾提孤軍出千里其利速戰

德威曰不然趙人能城守而不能野戰吾之取勝利
在騎兵平川廣野騎兵之所長也今吾軍於河上迫
賊營門非吾用長之地也莊宗退臥帳中德威謂監
軍張承業曰王怒老兵不速戰者非怯也且吾兵少
而臨賊營門所恃者一水隔耳使梁得舟楫渡河吾
無類矣不如退軍鄆邑誘敵出營擾而勞之可以策
勝也承業入曰德威老將知兵願無忽其言已而獲
梁遊兵言景仁治舟數百將以為浮梁莊宗笑曰果

如公所料乃退軍鄆邑德威晨遣三百騎叩梁營挑戰自以勁兵三千繼之景仁與德威轉鬪数十里至於鄆南梁軍橫亘六七里莊宗策馬進德威持馬諫曰梁軍輕出而遠來必不暇齎糧糗縱其能齎亦不暇食不及日午人馬俱饑因其將退而擊之勝至未申時梁軍東偏塵起德威鼓譟而進麾其西偏曰魏滑軍走矣又麾其東偏曰梁軍走矣梁陣動不可復整乃皆走遂大敗自鄆追至栢鄉橫尸数十里景仁

以十餘騎僅而免自梁與晉爭凡數十戰其大敗未
嘗如此劉守光僭號將兵三萬出飛狐入岐溝關取
涿州遂圍守光於幽州破其外城盡下燕諸州縣圍
幽州踰年破之拜盧龍軍節度使德威雖為大將常
與士卒馳騁矢石間守光驍將單廷珪望見德威於
陣曰此周陽五也乃挺槍馳騎追之德威佯走度廷
珪垂及側身少却廷珪馬方馳不可止縱其少過奮
撾擊廷珪墜馬遂擒之莊宗與劉鄩相持於魏鄩夜

潛軍出黃澤關德威自幽州率千騎入土門以躡之
郛至樂平遇雨還德威與郛俱東爭趨臨清臨清有
積粟且晉軍餉道也德威先馳據故莊宗卒困郛軍
而敗之莊宗勇而好戰尤銳於見敵德威老將常務
持重以挫人之鋒十五年德威將燕兵三萬人從莊
宗於河上宿胡柳陂黎明莊宗問戰德威對曰此去
汴州信宿而近梁軍父母妻子皆在其中而梁人家
國繫此一舉吾以深入之兵當其必死之戰可以計

勝而難以力爭也且吾軍先至此糧爨具而營柵完
以逸待勞宜按軍無動而臣請以騎軍擾之使其營
柵不得成樵爨不暇給因其勞乏而乘之可以勝也
莊宗遽督軍而出德威謂其子曰吾不知死所矣莊
宗率銀槍軍馳入梁陣梁軍小敗犯晉輜重輜重見
梁朱旗皆驚走入德威軍梁軍乘之德威父子皆戰
死莊宗與諸將相持而哭曰吾不聽老將之言而使
其父子至此莊宗即位贈太師明宗時加贈太尉配

享莊宗廟晉高祖追封燕王子光輔官至刺史

安重榮朔州人善騎射晉高祖即位拜成德軍節度使
重榮雖武夫而曉吏事子德裕字燕之性介潔博貫
羣史精於禮傳宋初舉進士甲科累官金部郎中出
知睦州還判太府寺有集四十卷

宋

党進朔州馬邑人幼事杜重威愛其淳謹後進貴重威
子孫貧困分月俸給之周廣順初隸軍伍補散指揮

使累遷鐵騎都虞候宗初轉都校領欽州刺史遷馬
步軍副都軍頭領虔州團練使改虎捷右廂都指揮
使領睦州防禦使改閬州乾德初為龍捷左廂都虞
候領利州觀察使後領步軍務五年領彰信軍節度
兼侍衛步軍都指揮使親征太原命副李繼勲將河
東行營前軍開寶二年師臨晉陽置砦四面命進主
東偏未成列太原驍將楊業領突騎數百來犯進奮
身從數人逐業業急入隍中會援兵至緣縋入城獲

免上激賞之六年改侍衛馬軍都指揮使領鎮安軍
節度九年又命將河東行營兵征太原入境敗其軍
於城北太宗初召還太平興國二年出為忠武軍節
度使在鎮歲餘遇疾卒年五十一贈侍中進形貌魁
岸居常恂恂至擐甲胄毛髮皆整時稱党太尉故事
都虞候已上悉書所掌兵數于槌上如笏記一日上
問所掌幾何進舉槌以示曰盡在是上以其朴直益
厚之見閭里畜禽獸者輒取而縱之罵曰買肉不供

父母反飼禽獸耶太宗親吏臂鷹雛於市進欲放之
吏曰此晉王鷹也進乃戒曰汝謹養視小民傳以為
笑子崇義閑廐使崇貴閭門祇候

王承美豐州人父某事契丹為左千牛衛將軍開寶二
年率衆來歸父卒授天德軍蕃漢都指揮豐州刺史
太平興國七年與契丹戰斬獲萬衆擒其天德軍節
度使韋太以獻明年契丹入寇擊敗其衆追至青塚
百餘里斬獲甚衆尋請於州城置孔子廟許之

姚兕字武之五原人父寶戰死定川兕補右班殿直為
環慶巡檢一矢斃夏酋夏衆潰遂破蘭浪夏圍諸砦
兕時駐荔原堡先羌未至據險張疑兵伺便輒出有
悍酋甚武射中其目斬首還一軍驩呼明日攻益急
兕手射數百人裂指流血又遣子雄引壯騎馳掩其
後所向必克敵乃退攻大順城復往救轉鬪三日斬
級數十卒全二城慶軍叛以親兵守西關盜奔兕追
及下馬與語皆感泣羅拜誓不敢為亂神宗聞其名

召入覲試騎射屢中的賜銀槍袍帶遷都監徙鄜延
涇原從攻河州飛矢貫耳戰益力河州既得果莊圍
之兇曰解圍法當攻其所必救乃往擊隴宗圍遂解
累遷皇城使進鈐轄從攻交趾有功領雅州刺史破
乞弟領忠州團練使進副總管遷東上閣門使徙熙
河與种誼合討洮州破六逋宗城夜斷浮橋援兵不
得度遂擒果莊真拜通州團練使卒於鄜延總管贈
忠州防禦使兇事母孝凡圖畫器用皆刻仇讐未報

字力學兵法老不廢書尤喜顏真卿翰墨曰吾慕其人耳與弟麟號二姚

姚麟字君瑞從兄兕攻河州中矢透骨鏃留不去以彊弩出之笑語自若積功至皇城使為秦鳳副總管從李憲討生羌擒隆吉卜再轉東上閣門使英州刺史元豐西討以涇原副總管從劉昌祚勝於磨嘴隘轉戰向鳴沙趨靈州而高遵裕敗降皇城使永興軍路鈐轄復為涇原副總管夏乞蘭會麟言秉常不廢即

為順命可息兵矣獨蘭會不可與願飭邊備示進討之形以絕其望從之督諸將討干格平經略使盧秉上其功賜金帛六百元祐初擢威州團練使龍神衛四廂都指揮使歷步軍殿前都虞候步軍馬軍副都指揮使紹聖三年以建武軍節度觀察留後出知渭州安燾請留曾布沮之韓忠彥曰奏對語言非所以責此輩乃留不遣尋拜武康軍節度使殿前副都指揮使王瞻取青唐麟謂方息肩柰何生此大患瞻果

敗徽宗進都指揮使節度建雄定武軍檢校司徒卒
駕臨之贈開府儀同三司麟沉毅持重不少縱捨宿
衛將嘗犯法詔釋之麟杖於庭而後請拒詔之罪故
所至肅然

姚雄字毅夫兕子少勇鷙有謀年十八從父討金湯以
首騎先登奪隘又成荔原功韓絳薦之閱試延和
殿征安南瀘川皆在行歷涇原秦鳳將駐甘谷城知
通遠鎮戎軍岷州官累佐騏驎使紹聖中渭帥章綽

城平夏雄部燕河兵策援夏傾國來鏖鬪矢注肩益
奮賊引卻追躡大破之斬三千級俘數萬先五日折
可適敗於沒烟雄得雋諸道始得并力城成擢東上
閤門使秦州刺史明年寇攻平夏勢銳甚雄與弟古
合兵卻之徙知會州遷熙河鈐轄王瞻略地青唐羌
攻湟鄯詔與苗履援之邈川方急雄至羌望見塵起
驚而潰遂趨鄯州履後期乃至瞻言蘭溪宗有遺寇
履即往雄諫不聽戒所部嚴備以待俄而履師退賊

追及雄整衆迎擊破之獻馘二千遣中使勞問徙河
州种朴戰沒王贍軍陷敵雄自鄯至湟四戰皆捷拔
出之遂築安鄉關夾河立堡以護浮梁通湟水漕運
商旅始集加防禦使建中靖國初議棄湟州詔訪雄
雄以為可棄遂賜趙懷德徙知熙州進華州觀察使
王原復河湟治棄地罪停雄官光州居住復竄金州
明年歸起權經略熙河安輯復新邊使知滄州加捧
日天武四廂都指揮使復為熙州遷安德軍節度觀

察留後步軍副都指揮使拜武康軍節度使召為中
太一宮使納節改左金吾衛上將軍又以武康節知
熙州熙河十八年間更十六帥唯雄三至凡六年尋
以檢校司空奉寧軍節度使致仕卒贈開府儀同三
司謚武憲

姚古兒子以邊功累官熙河經略靖康元年與秦鳳經
略种師中及折彥質折可求勤王時趣召師道師道
與古子平仲先率兵入衛欽宗拜師道同知樞密院

宣撫京畿河北河東平仲為都統制而种氏姚氏素為山西巨室兩家子弟不相下平仲恐功獨歸种氏忌之乃以士不得速戰為言欲夜劫營謀泄敗既而金退詔古等領兵十餘萬護送之金陷隆德以古為河東制置援太原古進兵復隆德府威勝軍扼南北關與金人戰互有勝負太原圍不解詔古與師中犄角師中約古等齊進而失期不至師中敗於榆次金人進兵迎古遇於盤陀古兵潰退保隆德詔以解潛

代之古屯威勝軍統制焦安節妄傳又勸古遁故兩
郡皆潰中丞陳過庭劾奏安置廣州

姚平仲古之子靖康中為太尉金人圍汴都平仲夜出
將士攻敵營不利逸去隱青城大面山建炎初所在
揭榜以觀察召之不出淳熙間人於丈人山見之年
幾百餘

孫谷朔寧人孫益知府事察其可用奏為椽屬待之異
於常僚益出師屬以後事益歿敵騎來攻衆議迎之

谷爭弗得嘆曰吾身已許國又不忍負孫公之託諸人不見容是吾死所也或舉刃脅之無懼容遂見殺

金

楊伯通弘州人大定初進士歷官吏戶二部尚書永安初拜叅知政事御史路鐸劾其引用鄉人詔同知大興府事賈鉉詰之鉉奏所劾不當乃責鐸而慰諭伯通以尚書致仕

武都字文伯東勝州人大定二十二年進士調陽穀主

簿遷商水令縣素多盜廉得姓名榜通衢約毋再犯
悉奔他境察廉遷南京路轉運度支判官累遷中都
路都轉運副使以親老與弟監察御史郁俱乞侍及
服闋調太原治中再遷欒州刺史充宣差北京路規
措官拘括散逸官錢百萬入為戶部郎中權右司奏
事稱旨由海道漕遼東粟賑山東高其價直募致海
賈船遷中都西京按察副使按察使大安三年充宣
差行六部侍郎行西南路六部尚書佐元帥默訥盡

忠備禦西京有勞召為戶部尚書賜銀絹宣宗即位
議衛紹王尊號不當削時人韙之知大興府佩虎符
便宜行事彈壓中外軍民坐被酒以褻衣見詔使解
職起為刑部尚書河東路宣撫使興定元年卒

完顏寓本名息楚西南路明安人大定二十八年進士
累調河東北路提刑司知事改同知遼州軍州事召
為國史院編修官遷應奉翰林文字南京路轉運副
使父憂起復太府監丞改吏部員外郎大安初知登

聞檢院累遷右司郎中翰林待制兼侍御史貞祐初
議衛紹王事寓請降復王封時置招賢所村夫王守
信敢為大言以諸葛亮為不知兵寓薦於朝詔置行
軍都統張行信高琪言守信不可用上然之頃之寓
遷禮部侍郎改東京副留守隴州防禦使遷安化軍
節度使兼山東路統軍副使興定元年四月詔以本
官權元帥左都監行元帥府事和輯苗道潤移刺鐵
哥軍十二月密州破寓為亂軍所殺

完顏安國字正臣其先占籍上京世有戰功祖薩爾帕授西南路世襲罕扎穆昆安國沉雅有謀畫尤善騎射正隆元年為謀克常以少擊衆大定中為常山薄轉虹縣令選充虞王府掾再遷儀鸞局副使明昌元年晉使會達實部長有乞修歲貢者詔安國往使至則羅拜執禮時北阻韃靼塞垣隣部邀安國俱行討安國以未奉詔為辭強之不可或怵以危言答曰大丈夫豈以生死易節暴骨邊庭不猶愈於病死牖下衆

壯其言餽贐如禮以奉使稱旨升武衛軍都指揮使
出為西北路副招討六年左丞相瓜爾佳清臣出兵為
先鋒都統適臨潢泰州部屬叛先討定之以功遷本
路招討使兼威遠軍節度使承安元年大鹽澤之戰
殺獲甚衆詔賜金幣既而右丞相襄總大軍為兩路
都統大捷於多泉子襄遣安國追敵僉言糧道不繼
安國曰人得一羊可食十餘日不如驅羊以襲之使
襄從之安國統所部萬人疾驅降其部長進官四級

遷左翼都統承安二年以營邊堡功召簽樞密院事
賜虎符還邊得以便宜從事並塞諸部降諭使輸貢
如初進拜樞密副使泰和元年特授世襲西南路延
晏河明安兼罕扎穆昆帝幸慶寧宮命嚴飭邊備奏
招西南路邊戍私竄者以安人心上是之三年致仕
封道國公四年起復前職卒輟朝葬以執政禮贈特
進安國在軍旅幾十五年號令嚴明又善伺知敵人
虛實及山川險易所向輒克諸部入貢能一一呼其

祖先弟姪名字以戒諭之諸部皆震悚焉

赫舍哩桓端西南路和掄桑噶明安人襲兄尼楚赫穆
昆泰和中充行軍萬戶破宋兵於蔡州加宣武將軍
渡淮敗宋步騎萬五千於鷓子嶺遂克安豐軍軍還
除同知懷遠軍節度使事權穆丹乂詳衮大安三年
西京行省選充赫辰萬戶遙授同知清州防禦事改
興平軍節度副使遙授顯德軍節度副使徙東路宣
撫司都統敗伊喇埒克五千衆於御河寨降萬餘人

加驃騎衛上將軍遙授同知順天軍節度事貞祐二
年為宣差副提控同知博索路兵馬都總管行府事
三年三月富森諤諾侵博索近境遣都統擊却之四
月復掠上古城別攻望雲驛遣軍拒戰破其衆數千
於三义里五月又拔其大寧鎮壘九月拒戰易池萬
奴衆潰去因招十一明安復來附四年遣王汝弼由
海道奏事宣宗嘉其功遷遼海軍節度使同知行府
事宣差提控如故博索路溫綽寬世襲明安是歲改

邳州刺史充徐州界都提控紅襖賊數萬攻邳州破之於黃山賊復來擊敗之溺沂水死者甚衆賊數萬圍沂州同知防禦事布薩薩哈突圍出求救率兵赴之薩哈還入城內外夾擊殺萬餘人賊乃去樞密副使布薩安貞上其功曰桓端天資忠實深有計畫曉習軍事薩哈勇而有謀皆得軍民心乞加擢用進金紫光祿大夫兼同知武寧軍卽度事提控如故召為勸農副使充都提控屯陳州興定元年渡淮破宋沙

渡店至定城以少擊衆戰不留行未幾充宣差參議
官復渡淮連破宋兵獲其將沈俊遷武衛軍副都指
揮使分兵破山寨水堡殺獲甚衆興定二年遷鎮南
軍節度使權元帥右都監尋改武衛軍都指揮使仍
權右都監行元帥府於息州又權簽樞密院事代石
嘉紐勒緡於徐州四年冬上言竊聞宋人與李全將
併力來攻當預為之防五年正月召至汴力疾草奏
大畧以南北皆用兵當預防其患及防河數策無何

卒年四十五勅有司給喪事

馬慶祥字瑞寧本名實喇濟蘇先世自西域徙家淨州
天山泰和中試補尚書省譯史大安初選使副通問
於元上曰實喇濟蘇智辯通六國語往必無辱也使
還授開封府判官內城之役充應辦使不擾而事集
未幾拜鳳翔府路兵馬都總管判官元光元年冬十
一月元將孟古布哈將攻鳳翔行省檄與治中胥謙
分道清野將行命畫工肖其貌付家人或曰君方壯

何乃為此不祥慶祥曰非汝所知也明日遂行遇先鋒於澮水戰不利且行且戰將及城元兵邀其歸路令衆騎曰吾屬荷國厚恩竭力効死乃其職也諸騎皆曰諾人殊死戰良久矢盡元兵圍數匝欲降之軍擁以行語言往復與謙皆不屈死贈輔國上將軍恒州刺史謚忠愍正大二年詔褒死節士十有三人立褒忠廟錄其孤而以實喇濟蘇為首

趙重福字履祥豐州人通大小字試補誥院今史轉兵

部譯使陝西提刑知法遷陝西東路都勾判官右藏
庫副使同知陳州防禦事時宋諜人蘓泉入河南重
福迹之至魚臺見前一舟將渡河令從者大呼泉姓
名中有倉皇失措者執之果泉也改滄州鹽副使歲
饑民煮溲賣以給食往往被杖重福曰寧使課殿不
忍殺人歲滿當降右承亮顏匡三司按出虎特薄其
罰除織染署令大安三年佐戶部尚書張煒調兵食
於古北口遷都水少監貞祐二年行西北路六部郎

中兼戶部員外郎治密雲縣守城有功遷同知河間府事行六部侍郎權清州防禦使攝河北東路兵馬都總管三年河間被圍密雲同事劉中勸降不聽時兵少又多羸疾勸父老率子弟強者戰弱者守圍乃解去遷河東北路轉運使致仕元光二年卒

完顏彝字良佐小字陳華善豐州人系出蕭王諸孫父齊格泰和南征以功授同知階州軍事後戰歿於嘉陵江從兄鼎字國器小字色埒必勒哈世襲明安以

善戰知名自壽泗元帥轉安平都尉鎮商州威望甚重敬賢下士有古賢將風嘗搜伏得歐陽修子孫併其族屬鄉里三十餘人縱遣之貞祐中彝為元兵所掠帥置諸帳下時母尚留豐州彝託以省母乞還帥以卒監之至豐乃與色埒刼殺監卒奮馬奉其母南奔元兵追之由他路得免兄弟共輓鹿車載母渡河宣宗授鼎都統彝補護衛旋轉奉御彝天資高明雅好文史人以秀才目之從鼎壽泗帥府充宣差提控

佩金符鼎辟太原王渥為經歷渥授彝孝經小學論
語春秋左氏傳略通其大義暇輒作牛毛細字如寒
苦士正大二年鼎為總領屯方城復隨以往鼎嘗病
鎮防軍葛宜翁與李太和相毆訴彝不直宜翁量啓
之宜翁鬱鬱死其妻訟為故殺當彝大辟彝聚書獄
中讀之明年鼎病愈詔提兵而西入見哀宗怪其瘦
甚曰卿寧以方城獄未決故耶吾今赦之矣鼎尋卒
上聞亟馳赦彝諭以汝兄死失吾一名將今故曲法

赦汝他日奮發立功國得汝力我始不為妄赦癸泣
且拜退以白衣領紫微軍都統轉忠孝軍提控五年
元兵入大昌原平章哈達命為前鋒時癸業沐浴易
衣若將就木裨者擐甲上馬不反顧是日以四百騎
破八千衆三軍踴躍自軍興二十年始有此捷奏功
第一手詔褒諭授定遠大將軍平涼府判官世襲穆
昆一日名動天下忠孝軍皆回紇乃滿羗渾及被俘
來歸者最號難制癸御之有方坐作進退皆中程式

所過州邑給常料外秋毫無犯街曲不復喧雜每戰則先登陷陣疾若風雨諸軍倚以為重六年有衛州之勝八年有倒回谷之勝自刑徒不四五遷為禦侮中郎將嘗與同列議副樞伊喇豐阿拉曰副樞好趨小利今日得生口三百明日得牛羊一二千士卒喘死則不復計國家積年兵力皆為是人破除盡矣豐阿拉聞之置酒會諸將至彝曰汝曾短長我誠有否彝飲畢徐曰有豐阿拉見其無懼容漫為好語云有過當面

論無後言也哈達入鄧州留彝閣鄉南十五里彝尋
隨而往九年正月三峰敗釣州城破縱軍巷戰彝趨
避隱處殺掠定乃出自言曰我忠孝軍總領陳和尚
太昌原衛州倒迴谷之勝皆我也若死亂軍中人將
謂我負國家今日明白死天下必有知我者時欲其
降砍足脛折不為屈割口吻至耳嚙血而呼至死不
絕元將義之酌以馬湏祝曰好男子他日再生當令
我得之彝年四十一贈鎮南軍節度使塑像褒忠廟

勒石紀其忠烈

完顏布拉都西南路按春愛爾新明安人充護衛除
泰定軍節度副使喪闋起復唐古部族節度副使徙
安國軍移紮詳袞累官原州刺史坐賈部內馬虧直降北
京兵馬都指揮使寧遠軍刺史歷同知臨洮府西京留守
事崇慶元年遷振武軍節度備禦有功遷一官初置
東西面經略司就充西面經略使上言管內太和嶺
諸隘屯兵控制邊要行帥府輒分臣兵萬二千成真

定餘衆不足守禦近復簡精銳二千七百以往今見
兵不滿萬老羸者十七八臣死固不足惜顧國家之
事不可不慮新設經略移文西京太原河東取軍馬
並稱非臣所統詔真定還其精銳二千七百人西京
太原嵐州有警約為應援州郡皆不欲屬經略司遂
罷經略官入簽樞密院事改左副點檢四年遷兵部
尚書興定中致仕卒

吳僧格西南路人拳勇善騎射大安間籍山西人為兵

充馬軍千戶有功貞祐初遷萬戶權順義軍節度使
復取朔州真授同知節度使事弟達拉授節度副使
燕蘇爾授節度判官提控馬實勒以下遷授有差僧
格乞賜糧十五萬斛朝廷以應州已破朔為孤城其
勢不可守乃遷朔之軍民九萬餘口分屯於嵐石隰
吉絳解間未行元兵至朔州戰七晝夜有功加遙授
同知太原府事兼同知節度使事達拉石州刺史曹
兒同知岢嵐州防禦使事四年始遷其民南行且戰

且行者數十里僧格力憊馬躓死馬贈鎮國上將軍
順義軍節度使

楊沃衍本名翰烈朔州靜邊官莊人少為北邊屯田小
吏元兵入境率本族唐德呼勒部入保朔州南山茶
杞溝朝廷遣人招之與衆來歸授武州刺史武州屢
經殘毀貞祐二年二月元兵來攻死戰二十七晝夜
不能拔乃退以功擢本州防禦使武州軍民遷寄嵐
州升寄嵐為節鎮即以爲節度使諭曰卿於國盡忠

屢有勞績其益勵忠勤與宣撫使輯睦以安軍民既奉詔即以身許國曰不死王事而死於家非大丈夫也三年屯涇邠隴三州有軍九千分為十翼五都統親統者十之四是冬與夏人戰俘斬幾二千獲馬八百餘匹器械稱是興定元年賜姓烏凌阿禾幾遙授通遠軍節度使兼鞏州管內觀察使將兵五千從元帥巴薩伐宋出鞏州鹽井至故城逢夏兵三百擊走之又入西和州至岐山堡遇宋兵六千凡三隊遣軍

分擊逐北三十餘里斬首四百級生擒人馬甲仗尋
復得散關二年遷官一階遙授知臨洮府三年武休
關之捷功居多元光元年遙授中京留守俄拜元帥
右監軍世襲努呼哈爾呼必喇明安二年春元兵游
騎數百掠延安而南約圖們呼圖克瑪勒以步軍會戰呼
圖克瑪勒宿將常輕沃衍遂失期沃衍獨率兵追之野猪
嶺獲四人而還欲斬呼圖克瑪勒諸將哀請乃釋之俄而
兵大至駐德安寨復擊走之未幾元兵攻鳳翔還道

出保安遣提控完顏察喇破於石樓臺前後獲馬二百符印數十詔有司論賞時元兵破西夏長驅至關輔皆洶洶不安獨沃衍率其步將劉興哥往來邠隴間屢戰屢勝故元兵不能東陝西行省檄令清野不從嘆息曰我若清野明年民何所食遂隔大澗持勢使民畢麥事正大二年進元帥左監軍遙領中京留守八年冬哈達豐阿拉入鄧州留沃衍守閬鄉詔令取洛南路入商州備上津與武仙相犄角諜知元兵由

豐陽而東還會二行省軍於五朶山下憤曰平章叅
政蒙國厚恩握兵柄失事機不能禦戰乃縱兵深入
尚何言耶三峰敗沃衍走鈞州其部曲白魯諾爾愛劉
勝降元請招沃衍元帥令勝見沃衍曰降則授大官
沃衍善言慰撫之使前拔劍砍之曰我起身細微蒙
國大恩汝欲以此汚我耶遂遺語部曲後事望汴京
拜且哭曰無面目見朝廷惟有一死耳即自縊部曲舉
火并所寓屋焚之從死者十餘人時年五十二

伯特庫克西南路人壯健沉勇元兵克西南路鄰郡皆
降庫克獨不屈貞祐五年東勝州破庫克與裕爾雅
呼裕爾雅爾招集義軍披荊棘復立州事興定元年
詔遙授武州刺史權節度使裕爾雅呼權同知節度
使事裕爾雅爾權節度副使興定三年遙授同知晉
安府事尋真授東勝軍節度使東勝被圍糧絕率衆
潰圍走保長寧寨九月復被圍庫克死之

程震字威卿東勝人與其兄鼎俱擢第震入仕有能聲

興定初任陳留令治為河南第一召拜監察御史彈劾無所撓時皇子荆王為宰相家僮席勢侵民震劾奏曰荆王以陛下之子任天下之重不能上贊君父同濟艱難顧乃專恃權勢蔑棄典禮開納貨賂進退官吏縱令奴隸侵漁細民名為和市其實脅取諸所不法不可枚舉陛下不能正家而欲正天下難矣上乃責荆王出內府銀以償物直杖司馬以下及大奴尤不法者數人未幾坐為故吏所訟罷官歲餘嘔血

卒震剛直有材幹忘身徇國不少私假臺綱大振小人側目以故不能久留於朝士論惜之

富察哲琳明安人舉進士順義軍節度使禁遊食蓄兵器陳辭友弟爭自平加意撫安盜自息



山西通志卷一百十九